



# نساء في سوق العمل العاملات وسياسات الخصخصة

باحثة رئيسية  
إنتصار بدر





مؤسسة المرأة الجديدة

## ورش العمل الخاصة ببحث "النساء فى سوق العمل"

الهيئة الاستشارية للبحث: نولة درويش وهالة شكر الله  
الباحثة الرئيسية: انتصار بدر  
منسقة أعمال ورش العمل: منى عزت

تصميم وتنفيذ: Promotion Team ت: ٣٣٣٦٧٤٤٩

تم إصدار الأجنحة بدعم من مؤسسة توفيق

## مقدمة

هذا الكتيب هو نتاج ثلاث ورش عمل حول نتائج بحث "النساء في سوق العمل" الصادر عن مؤسسة "المرأة الجديدة" وعقدت ورش العمل خلال شهري مارس وأبريل ٢٠٠٨ في ثلاث محافظات وهي: القاهرة والإسكندرية والسويس وكان الهدف من هذه الورش هو:

التعريف بنتائج البحث وتوسيع دائرة المهتمين بهذه النتائج، بلورة ملامح برامجية وتدخلات ملائمة للتفاعل مع الفئات المستهدفة (عاملات ونقابيات)

لذا حرصت مؤسسة "المرأة الجديدة" على تنوع المشاركين في هذه الورش وأيضا الأماكن الجغرافية للاستماع والاستفادة من خبرات مختلفة والاقتراب أكثر من واقع العمالة النسائية فتم تخصيص ورشة عمل، والتي عقدت بمقر المؤسسة في القاهرة للباحثين والجمعيات الأهلية المهتمة بالقضايا العمالية فضلا عن نقابيين ونقابيات، وأخذت هذه الجلسة منحى نظريا مرتبطا بمنهجية البحث وأدوات التحليل وقدموا مقترحات تم مراعاتها في الصياغة النهائية للبحث.

أما ورشنا عمل الإسكندرية والسويس فكانتا ذات منحى مختلفا فعقدت ورشة عمل بجمعية "المرأة والتنمية" بمحافظة الإسكندرية وضمت عمالا وعاملات وقيادات نقابية من مصانع (غزل المحلة - الحناوى) وعددا من ممثلي الجمعيات الأهلية في الإسكندرية أما الأخرى فعقدت بجمعية تنمية المجتمع بقرية الشلوفة بمحافظة السويس وضمت عاملات من محافظات (الإسماعيلية والسويس) وجمعيات أهلية من محافظات (بورسعيد - السويس - الإسماعيلية)، وكان هناك حرص على أن يتحدث الجميع كما يشاء دون الانحياز أو توجيه مسار الحديث إلى وجهة نظر محددة.

عبر الحضور من العاملات عن واقعهن وما يتعرضن له من تجاوزات أو

انتهاكات داخل أماكن العمل وأيضاً عرضن لأشكال التداخلات التي يحتاجن إليها ومنها التدريب على (الحقوق الاقتصادية والاجتماعية – آليات التفاوض – الحقوق النقابية).

قدمن شهادات حية عكست فهما حقيقياً لواقعهن، ووجدنا من الضروري توثيقها وطباعتها وتوزيعها على نطاق واسع بين جميع المهتمين بالقضايا العمالية عامة وتحديداً النساء العاملات والتي لا تزال قضاياهن تحتاج لمزيد من تسليط الضوء عليها والاشتباك معها.

سوف يتضمن الكتيب عرضاً لورثتي (الاسكندرية والسويس)، ولم نَقم بأي صياغات لما قيل بهما، وقدمنا ما يمكن تسميته بمضابط تلك الجلسات، واستخدمت نفس اللغة الدارجة التي جاءت بها حتى يلمس القارئ الروح التي تمت بها، ويبنى عليها استنتاجاته.

سيدعم هذا الكتيب أحد أهداف ورش العمل وهو تشجيع العاملات على الخروج من دائرة الصمت والتعبير عن قضاياهن وإدراكهن بأن قضاياهن هي قضايا عامة تخص جميع العاملات في القطاعات الصناعية المختلفة

يجدر الإشارة الى أن هذا الكتيب هو جزء مكمل لبحث (النساء في سوق العمل) وهو ضمن أنشطة تقوم بها المؤسسة من أجل تحقيق ما نؤمن به من حق النساء غير المشروط في الحرية، والمساواة، والعدالة الاجتماعية، كما نؤمن بأن حقوق النساء الاجتماعية، والسياسية، والاقتصادية، وحقوقهن الإنجابية، والحق في المواطنة جزء لا يتجزأ من حقوق الإنسان. وفي هذا الإطار، ترى المؤسسة أنه لا يمكن فصل النضال من أجل حقوق النساء عن نضال الأمم والشعوب من أجل العدالة، والتحرر من القمع.

## ورش العمل بمحافظة الإسكندرية

المكان: جمعية المرأة والتنمية

التاريخ: ٢٢ مارس ٢٠٠٨

\* عائدة نور الدين: أهلاً وسهلاً بكم في اللقاء اليوم عن النساء العاملات وسياسة الخصخصة.. أولاً كل سنة وانتم طيبون بمناسبة المولد النبوي الشريف، وشهر مارس الجميل اللي كله أعياد للمرأة... ونعتذر عن التأخير ومعكم الآن الأستاذة نولة والأستاذة هالة.

\* نولة درويش مؤسسة "المرأة الجديدة": أولاً نعتذر عن التأخير عليكم لكن ذلك كان بسبب عطل علي الطريق الصحراوي، ويسعدنا أننا نقيم هذه الندوة بالتعاون مع جمعية "المرأة والتنمية"، أننا مهتمون أساساً نسمع لكم، ولكن قبل ما نسمع لكم سيكون هناك عرض مختصر من الأستاذة هالة شكر الله والأستاذة انتصار، وسنستمع الآن الي الأستاذة هالة.

\* هالة شكر الله مؤسسة "المرأة الجديدة": مساء الخير يا جماعة.. وأسفين علي التأخير.. أنا أريد ان أضيف كلمة.. التأخير كان بسبب ان هناك طريقاً جديداً ينشأ اسمه الطريق الحر، نحن لحد الآن لا نعرف ما هو الطريق الحر... فيه مناطق حرة وطرق حرة وأسواق حرة.. يعني الحرية كثر جداً عندنا.. لم نعد نعرف معناها، لكن الشيء الواضح بالنسبة لنا ان معنى الحرية هنا في بلدنا التي هي يفلوس.. أليس كذلك؟! فكل حاجة تقريباً سندفع فلوس في مقابلها هي اسمها الحرية، فمن الواضح ان هناك طريقاً حراً ينشأ الآن فابشروا!!!.

هذا مدخل طريف لأننا بنقابل مثل هذه الحاجات طوال الوقت في السكة، لأننا علي مدي العشرين أو الثلاثين سنة طرات تغيرات كثيرة جداً في واقعنا كلنا في المجتمع كله، وهذا أثر تقريباً علي كل الفئات اللي عايشة، اللي عايشة خصوصاً في مستوي معين من الوظائف والأجور... إلخ، في الدراسة التي قمنا بها.. كان هذا الموضوع طبعاً يعنيننا ويهمنا، ويهم أي جمعية لديها انحياز لمصالح الناس أساساً... الناس الذين هم أقل وصولاً للحقوق وأصحاب المصالح المهضومة... إلخ.

فبالتالي كان من الطبيعي جداً.. أننا في لحظة نقول.. ما هي التغيرات التي تحدث؟ وكيف تؤثر علي الناس؟ ان كان معظم الشركات الآن في القطاع العام الذي تحول لقطاع الأعمال.. والذي تم تأجيله مش عارفه لمين وفلان وعلان.. والذي بيع منه أجزاء.. والذي طرد منه كثير.. والذي صفي منه.. والذي طلع علي المعاش المبكر.. أقصد هناك كمية أحداث بتحصل من ١٥، ٢٠ سنة، وكيف أثرت علي الناس؟ كل واحد عارف.. أقصد كل واحد منكم بيشتغل في هذه المواقع يعرف كيف أثرت عليه..

طب كيف أثرت علي مجمل الناس. ونحن طبعا ركزنا علي النساء ليس فقط لأننا مؤسسة تعمل أساسا علي حقوق المرأة، لكن لأننا نري أن الستات يتعرضن لأنواع مختلفة من الضغوط.. فهي تشتغل وبتتوظف في مكان مثلها مثل الرجل، وهذا من ناحية لكن من ناحية أخرى.. المجتمع.. وهي راحة تشتغل هو يقول لها لأ.. أنت تقعد في البيت، فهي راحة وهي في موقف ضعيف.. يعني هي راحة تشتغل وهي في موقف ضعيف اجتماعياً.. وهي تتعرض لمضايقات وهي راحة.. وهي تتعرض لمضايقات وهي في الشغل.. وهي تتعرض لمضايقات وهي راحة.. كل هذا يضعها في موقف أضعف من الرجل.. وهذا لا يعني أننا نقول إن الخصخصة والإصلاح الهيكلي والتغيرات والسياسات... الخ لم تؤثر علي العاملين والعاملات بنفس الشكل، لكن هناك خصوصية بالنسبة للنساء والعاملات بالتحديد، لأن الست لما تبقي في وضع أكثر ضعفا، ككتلة بشرية هي أضعف من الناحية الاجتماعية.. أنا لا أقصد ضعف جسمانياً.. أنا أقول وضعها أضعف.. يعني هي مدانة، هي حد مدان لما هي تخرج للشغل.. هي حتى في مكان الشغل نفسه تتعرض لكم مشاكل لا تقدر أن تحمي نفسها منها، وهي غير منظمة بشكل كاف أيضاً.. ولا توجد خبرة لتنظيمها طويلاً.. أن تنظم وتطالب بحقوقها وحاجات من هذا القبيل. ولأزم تجري ترجع البيت لأن أولادها منتظرينها.. كل هذه الأشياء خلقت وضعاً أصبحت الست العاملة هي أقل أجراً بالنسبة للمستثمر.. الذي جاء ليستثمر ويكسب جامد يري أن العاملات أحسن انه يوظفهن لأن أجرهن أقل وبالتالي هيربح أكثر لو وظفهن، ويقدر يشغلن أكثر ولن يعترضن لأنهن أقل تنظيمًا، وهذا الوضع ليس فقط في مصر.. طبعا في مصر بنشوفه من ٢٠ سنة، لكن سنجد أن من يدرس مجمل ما يحدث في العالم، سيد أن في أسيا هذا الكلام منتشر جداً لدرجة أن كل صناعات التليفزيونات والراديوهات والحاجات الغالية قوي دي بتتعمل من الستات في البيوت.. بيعطوهن اللط ويتركبن في البيت، دي بتعملها في بيتها وتأخذ أخص الأثمان.. أبخس الأسعار بتشتغل بها والفلوس كلها بتروح في مراكز الصناعات الكبرى في أوروبا وأمريكا واليابان... إلخ، مثل ما قلت لكم اهتamina نشوف الوضع طب لما نأتى للتطبيق كيف يؤثر علي الستات.. وعلي أجورهن.. وعلي ساعات العمل.. وعلي أوضاعهن في العمل.. وفي المنزل.. وهذا ما سنتحدث عنه الأستاذة انتصار، ما أريد أن أقوله في الخلاصة، إننا نري الآن ما يسمى بمرونة في قوة العمل بمعنى انه أصبح من السهل جداً لصاحب العمل ان يعين ويطرده في أي وقت، ممكن يبقى عندي مصنع في لحظة ٢٠٠٠ عامل وعاملة واللحظة الثانية علي طول يبقى ١٠٠ عامل وعاملة فقط.



لا توجد أي مشكلة.. هناك مرونة في قوة العمل.. علي حسب انا عايزة انتج ايه.. الحاجة الثانية انه هناك غياب حماية كافية تقريبا بالنسبة للعمال غير المثبتين، من هم في القطاع الخاص.. والتي هي أصبحت الأغلبية الآن.. وفي قطاع الأعمال، وهذا ما سنتكلم عنه الأستاذة انتصار. الجزء المعين الذي كان مثبتا هو الذي يتدرج وظيفيا من الدرجة العاشرة للدرجة الأولى... إلخ. قلت جدا نسبته بالنسبة للمعينين بعقود أو بشكل موسمي، وبالتالي المساحة من العمال والعاملات غير المحميين بقوانين ولا أشكال دفاعية كثرت جدا جدا في مصر، وبالتالي تجد في القطاع الخاص.. يعني المفروض النضال العمالي بدأ من زمان جدا من القرن اللي فات، وكان أحد المطالب ان ساعات العمل تبقي ٨ ساعات، احنا بنرجع النهاردة... ساعات العمل بتبقي ١٢ ساعة.. يعني نحن نرجع للوراء.. كما أقول انه هناك غياب قوانين بتحمي.. الذي حدث هو التخلص من العمالة كبيرة السن في قطاع الأعمال خصوصا.. وكلنا يعرف المعاش المبكر ولماذا العمالة كبيرة السن؟ لأن العمالة كبيرة السن عادة بتأخذ فلوس أكثر لأنها بتزيد كل سنة بعد سنة، فكان لازم التخلص منها وبداية الاعتماد علي الجدد، الداخلين الجدد وبالتالي أجرهم أقل طبعا. هناك مشاكل أخرى تتعرض لها المرأة. انا تكلمت علي المضايقات والتحرشات... إلخ. وهذه أشياء ستجدها منتشرة في القطاع الخاص والورش الصغيرة، هل هناك أشكال حمائية لهؤلاء النساء أم لا؟، هناك غياب لأي شكل من أشكال لجان الشكاوي أو الأشكال التي تحمي النساء... إلخ. فتجعلها طول الوقت في وضع قاس قموة شديدة. أنا سأنتهي هنا لأن هذا كان بالنسبة لنا سبب أهمية الدراسة، وسأنتقل الكلام للأستاذة انتصار تنخل في الدراسة نفسها.

\* انتصار بدر: أنا سأشرح لكم هنا سريعا كيف تمت الدراسة، وخصوصا اننا قمنا بها في توقيت كانت فيه الخصخصة بتنتهي، اللي جاي كله استثمار ورجال أعمال كما قالت الدكتورة هالة، العمالة القديمة تقريبا خلاص بتتصفي أما بتخرج "معاش مبكر" أو بتخرج "معاش طبيعي"، وبالتالي كان لدينا مجسات عندما كنا بنعمل هذه الدراسة، ان شروط العمل التي تعمل فيها المرأة كانت في غاية الصعوبة وفي تدهور شديد، ولذلك كان السبب ان ننزل في ذلك التوقيت نشوف شروط العمل الخاصة بالمرأة علي نطاق واسع في المجال الصناعي، بدأنا العمل في الدراسة من شهر يوليو ٢٠٠٦، وانتهينا منها في نهاية ٢٠٠٧، وستصدر في كتاب من عشرة فصول بعنوان "نساء في سوق العمل".. في الجزء الأول من الدراسة حاولنا أن نتابع فيه كل إجراءات الخصخصة من اتفاقيات وقرارات وقوانين وردود أفعال من بداياتها من سنة ١٩٧٤

وحتي صدور قانون العمل الموحد، وكيف تمت تلك العملية.. ورصدنا تلك الفترة، ورصدنا فيها كيف تم التخلص من العمالة عن طريق المعاش المبكر، لأنه كان أحد أهم شروط الخصخصة إتمام عملية التحول -تحول مصر- السياسي والاقتصادي هو التخلص من العمالة القديمة، العمالة كما قالت الدكتورة هالة الأكثر خبرة، الأعلى تكلفة، الأكثر تنظيماً.. كانت توجد لجان نقابية في المصانع وبالتالي الأكثر قدرة علي الدفاع عن مطالبها وعن حقوقها، وكان المستهدف ان يتم استبدال هذه العمالة بعمالة أقل تكلفة، أقل تنظيماً، غير قادرة علي المطالبة بأي حقوق.. هذا كان الجزء الأول، والجزء الثاني كان مهما جدا نشوف شروط العمل علي نطاق واسع والتغيرات التي طرأت عليه في ثلاثة قطاعات صناعية هي صناعة الغزل والنسيج، وهذا كان الجانب الميداني.. اشتغلنا في حوالي ١٨ شركة صناعية في قطاع الغزل والنسيج، في قطاع الصناعات الكيماوية، في قطاع الصناعات الهندسية، أخذنا شركات قطاع أعمال وأخذنا شركات استثمارية، وحاولنا نشوف أين تتركز النساء في أي أنشطة صناعية في هذه القطاعات؟ ومن هؤلاء النساء وما هي طبيعة عملهن، وأجورهن، وظروفهن الاجتماعية، ما هي الشروط التي يعملن بها داخل هذه الشركات من ساعات عمل، من أجور، من خدمات تقدم لهن، من مشكلات، وكان من المهم ان نتعرف علي كل ما يتعلق بالمسائل الخاصة بعملهن داخل هذه المنشآت الصناعية.. أحب أعطيك فكرة عن الشركات التي عملنا هذه الدراسة عليها.. أخذنا من قطاع الغزل والنسيج عددا من الشركات، قطاع الأعمال والاستثماري، أخذنا شركة غزل المحلة اشتغلنا فيها، أخذنا شركة أستيا والشرقية للكتان هنا في الإسكندرية، أخذنا شركات مثل غزل إيران والسامولي، وأبو السباع في المحلة، وأخذنا بعض العاملات من مناطق الريف يعملن في مناطق صناعية في القاهرة في مدينة نصر والهرم وشركة تايوان في مسطرد، وأخذنا أيضا شركة غزل إيران في السويس وهذا بالنسبة لشركات الغزل والنسيج. أما الشركات الهندسية اشتغلنا في بنها للأجهزة الكهربائية واشتغلنا في المعصرة وهما يتبعان الإنتاج الحربي، اشتغلنا أيضا في شركات مثل توشيبا وتيلمصر، وفي الصناعات الكيماوية اشتغلنا في شركة سيد والمنظفات والزيوت والصابون والشا والخميرة، وأخذنا أيضا شركة لصناعة البلاستيك.. لاحظنا ان مثلا في قطاع الغزل والنسيج أن النساء يتركزن في مصانع الملابس.. كل الستات الآن نقلن لمصانع الملابس بالإضافة الي انهن طول الوقت يعملن في مصانع حلج اللأقطان، فهن من يقمن بأعمال الفرفرة وفرز القطن وتنقيته... الخ. بالنسبة لشركات الصناعات الكيماوية كانت تقريبا مصانع الأدوية حكرا علي النساء، يليها المنظفات والصابون

الي آخر هذه المنشآت التي أخذناها التي تتركز فيها عمالة المرأة، في الصناعات الهندسية يتركز في صناعة الأجهزة الكهربائية وتجميعها، وهذه هي الأنشطة داخل هذه الصناعات التي تعمل فيها المرأة، أما باقي الأنشطة الصناعية فيعمل فيها الرجال، معظم هذه الأنشطة تقوم فيها الستات بكل مراحل الإنتاج ومعظمها قائمة علي العمل اليدوي والتجميع والتعبئة... إلخ.

الأنشطة التي تتجمع فيها الستات مثل ما ذكرنا تحتاج لعمالة كثيفة العدد وهي الأقل في مسألة الأجور، أيضا لاحظنا أن شركات القطاع الاستثماري تستخدم عمالة صغيرة السن جداً.. يعني تقريبا أعمارهن لا تزيد على ٣٠ سنة وأغلب العمالة هناك أقل من ٢٠ سنة.

ساعطيكم فكرة سريعة عن الشركات التي طبقنا فيها، وكيف أثرت الخصخصة عليها وأثرت علي حجم العمالة بها. أول شيء أن معظم شركات قطاع الأعمال كانت العمالة بها تتراوح ما بين ٥ الي ٤٥ ألف عامل وعاملة وبعد الخصخصة انخفضت....

\* هالة شكرالله: انا ساكمل بدل من انتصار علي أساس أنها ترتاح شوية لحد ما ضغطها يعطي.. الحر هيعمل فينا كلنا كده.

هي كانت بتتكلم عن نوع العمالة وكيف أن خصائص العمالة بدأت تتغير.. تكلمت علي ان السن الكبير بدأ يزاح أو يقل قوي.. السن الصغير هو الذي بدأ يستخدم أكثر، الشركات التي تعمل بها النساء تنقسم بانها يوجد بها كثافة عددية، وعادة عندما نقول كثافة عددية يعني أجر أقل.. شركات قطاع أعمال كما كانت تقول تقريبا عدد العمالة اللي فيها قلت جدا، أنا عارفة ان شركة المحطة مثلا كانت في حدود ٤٠ ألفا نزلت النصف ٢٦ ألفا، نزلت أكثر من النصف، اسكو في شبرا حوالى ٢٥ ألفا نزلت للا شىء، يعني انا لما روحت درست كان من ٧ سنين كانت وصلت الي ٦ آلاف عامل، وكانت خطوط الإنتاج متوقفة تقريبا، طبعا كيف تمت عملية التصفية هذه؟... هذه قصة طويلة.. كل العمال الذين عملوا في شركة وتابعوا عارفين قصتها كويس جدا.. يعني أحسن ناس تقولك كيف قامت الخصخصة هم العمال الذين عملوا في هذه الشركة، شركات قطاع الأعمال طبعا عملية التفاوض ماذا حدث للإنتاج عند تصفيته؟ انخفض الإنتاج وقل، وكان الصراع والتفاوض يتم علي الحوافز، فيقول لك نحن شركة لا تنتج وبالتالي لا توجد أرباح.. والأرباح طبعا جزء مهم جدا وكبير جدا من الراتب، لأن ممكن نبدأ بالأساسي يعني ممكن يبقى ٤٥ جنيها و ٦٠ جنيها والأرباح تصل الي ٤٠٠ جنيها، هذا طبعا غير المتغير، المتغير ممكن يبقى ٦٠ جنيها. هذه هي شركات

قطاع الأعمال فهي فيها تفتيت الأجر سمة أساسية.. الأجر هو ليس شيئا واحدا يجب ان تجمعه كي تعرف الأجر الإجمالي.. العملية معقدة جداً.

فصراع كل العمال والعمالات تقريبا طول السنوات علي موضوع المتغير.. بالنسبة للشركات الإستثمارية الأجر ثابتة، يعني هذه هي المقارنة بين قطاع الأعمال والقطاع الإستثماري الأجر ثابتة حتي لو زادت معدلات الإنتاج.. يعني ممكن الإنتاج يبيي بيزيد جدا لكن الأجر ثابتة.. بالنسبة للخدمات في قطاع الأعمال تراجعت بشكل كبير.. يعني قلت خدمة المواصلات، قلت المصايف، السلع المدعومة تكاد تكون انتهت، السكن الإداري، دور الحضانة.. اعتقد ان كان دايميا فيه مشاكل، كانوا بيلاقوا طرق للإلتواء حول الحضانة ويعينوا أقل من ١٠٠ ست... إلخ.

الحاجة الإضافية التي تمت ملاحظتها في الدراسة ان زي ما كنا بنقول ان القسم الذي مازال معينا "المثبت" في قطاع الأعمال أقل جدا، وبالتالي هذه الخدمات يحطي بها العمال المعينون فقط، ليس العمال اللي بعقود مؤقتة أو بالعقود الموسمية، أما بالنسبة لشركات الاستثمار فليس بها أي نوع من الخدمات.

لوحظ تكني خدمة المواصلات هناك بعض الشركات تقدمها بشكل اضطراري وهذا مرتبط بالعمالات اللاتي يقطن القرى الزراعية وينتقلن في سيارات نصف نقل وبشكل غير آمن جدا.. بالنسبة لأشكال التعاقد في شركات قطاع الأعمال قبل الخصخصة كانت بتعين، وأحنا عارفين التعيين تقريبا خلص علي ١٩٨٢.. بعد الخصخصة أصبح هناك نوعان من التعاقدات: المعينون بشكل دائم وهؤلاء مازالوا من العمالة كبيرة السن، والذين تم تعيينهم قبل عام ٩٠ وهؤلاء هم أقل من ثلث العمالة في الشركة، العمال بعقود مؤقتة وهؤلاء تم تشغيلهم بعد عام ٩٠، بالإضافة للعمالة الموسمية، وهؤلاء في مصانع حلج القطن ومنهن عاملات الفرفة أساساً.. في شركات الاستثمار كل العمالة بعقود مؤقتة، واعتقد انه قليل قوي لما نتكلم عن إحدى العمالات وتقول انها شافت العقد اللي متعاقد عليه، هذا بالإضافة لمن يعملن بلا عقود أصلاً، وبالتالي بنلاحظ ان الفرق ما بين قطاع الأعمال والقطاع الخاص.. الحقيقة الفجوة قلت جداً ما بين الاثنين، بالنسبة للجان النقابية كانت طبعاً موجودة في شركات قطاع الأعمال بغض النظر عن رأينا في أدائها لكنها تمثل الآن ثلث العمالة فقط داخل الشركة بما اننا بنتكلم علي ان ثلث العمالة فقط هي المعينة، فاللجان النقابية هذه لا تعبر سوي عن المثبتين. ولا تعبر عن العمالة المؤقتة، لأن القانون الجديد يمنع الدخول في عضوية اللجان النقابية علي العمال ذوي العقود المؤقتة، في شركات الاستثمار كان هناك فقط ٣ شركات اللي كان بها لجان نقابية وهي غزل ايران، والسامولي تم حلها، وتلي مصر كانت فيها

لجنة لكنها لجنة إدارية معينة من قبل الإدارة، طبعاً الذين يعملون في القطاع الخاص يعرفون صعوبة تكوين لجان نقابية في القطاع الخاص لأن العدد تقريبا وفقاً لقانون العمل ووفقاً لقانون النقابة لازم عدد ٥٠ تقريباً يعضوا ويرسل إلى النقابة العامة أو الاتحاد، والذي يقوم بالتالي بإعادة هذه الأسماء إلى الشركة، والشركة بمجرد معرفتها بالأسماء فبتروح فصلاهم، وتلك دائرة غريبة جداً... فبالتالي هناك صعوبة في تشكيل لجان نقابية تعبر عن مصالح العمال.. في فترة الدراسة كانت شركات قطاع الأعمال، كان فيها احتجاجات.. غزل المحلة كان فيها إضراب.. الشرقية للكتان.. النصر للتليفزيون.. سيد للأدوية كانت بسبب بيع أصول الشركة، الشركات الاستثمارية كانت تلمص العمل كان توقف بالمصنع لصالح فرع الإسماعيلية.. غزل إيران كانت وقفت خدمة المواصلات وانتشلت الأرباح.. السامولي كان هناك فصل العمال وسوء معاملة.. أبو السباع كان هناك نقل عمالة.. القاسم المشترك بين الإحتجاجات كانت الحوافز، الأجور، الأرباح.. واعتراضها على اللجان النقابية وكانت بتطالب بسحب الثقة منها في بعض المناطق لأنه كان هناك مشاكل، أهم ملمح هو تحويل العمالة داخل شركات قطاع الأعمال إلى عمالة مؤقتة ثلثها من العمال في شركات الاستثمار، أما بالنسبة لشروط العمل، فغالبية العاملات لم تتجاوز أجورهن ٣٠٠ ج وهذا في قطاع الغزل والصناعات الكيماوية، وهذا أقل من النصف قليلاً في شركات قطاع الاستثمار، يحصلوا على أجر ما بين ١٠٠ ج إلى ٢٠٠ ج شهرياً.

\* انتصار بدر: بالنسبة للأجور تقريباً غالبية العمالة في القطاعات الثلاث أجورهم لا تتجاوز ٣٠٠ ج بالذات لأن في الثلاثة قطاعات.. أسفة.. لأ، في قطاع الغزل والنسيج والقطاع التابع للصناعات الكيماوية تتحسن الصورة شوية في الصناعات الهندسية وده راجع إلى نوع العمل الذي يحتاج إلى تعليم أعلى شوية، يحتاج إلى مهارات فنية أعلى شوية، فسنجد فروقات كبيرة في الحصول على الأجر هن عاملات الغزل والنسيج، سواء قطاع الأعمال أو الشركات الاستثمارية، وشركات الصناعات الكيماوية أيضاً أجورها لا تتجاوز الـ ٣٠٠ ج.. يعني تقريباً نصف العاملات في قطاع الغزل والنسيج كله وهذه هي النقطة التي كانت الأستاذة هالة بتتكلم عليها، أجورهن في شريحة من ١٠٠ ج إلى ٢٠٠ ج.. فهذا أجر شديد التلني.. بقية العاملات تتراوح أجورهن ما بين ٢٠٠ ج و٣٠٠ ج.. يعني في جميع الأحوال كل عاملات الغزل والنسيج والشركات الكيماوية أجورهن لا تتعدى الـ ٣٠٠ ج.. بعد كده سنجد مثلاً أن زي ما قلت النسبة بترتفع شوية.. نسبة الأجور بترتفع شوية في الصناعات

الهندسية ممكن تصل إلي ٤٠٠ ج.. مثلا في شركات الاستثمار.. أيضا في القطاع الهندسي كانت أجور البنات حوالي من ١٠٠ ج الي ٣٠٠ ج.. هذا في شركات قطاع الاستثمار ونسبته قليلة جدا بتأخذ من ٣٠٠ ج الي ٥٠٠ ج في الشهر. حوالي ١٠٪ مثلا حوالي نصف العائلات في شركات الاستثمار وصلوا الي ٧٠٠ ج وده لسبب بسيط لأن شركات الاستثمار اللي اخذناها كان فيها شركة تليمصر وهي شركة كانت في الأول من قطاع الأعمال العام وتحولت للقطاع الإستثماري، فالعمالة القديمة فيها اللي بقالها أكثر من ٢٠ سنة أجورها كانت ارتفعت شوية، لكن علي العكس بقي مثلا شركة توشيبا العربي هذه تتبع قطاعا استثماريا كانت الأجور اقل لكن في النهاية كانت أجورا مرتفعة.. يعني ممكن تصل البنت الي ٤٠٠ ج في الشركة.. هذا بالنسبة للأجور، أما بالنسبة لساعات العمل شركات قطاع الأعمال مازالت ملتزمة بال ٨ ساعات يعني متشتغلش البنت أكثر من ٨ ساعات، متشتغلهاش في الورديات الليلية، لكن بتحرمهن من العمل في الساعات الإضافي بتديها للرجالة.. وطبعا دي مسألة فيها تمييز كبير جدا ضد البنات... شركات الاستثمار كانت بتتجاوز بشكل مرعب في مسائل عدد ساعات العمل.. شوفنا البنات في شركات الغزل والنسيج يعملن ١٢ ساعة، يعملن في الوردادي الليلية... شركة غزل ايران بتشغل البنات وورديات ليلية، بالإضافة الي انهن يعملن ١٢ ساعة. وهذا أيضا موجود في شركات الصناعات الكيماوية وخاصة الشركات الموجودة في مناطق صناعية، بتبقي العين عليها قليلة.. لا توجد رقابة.. هناك عمل من الساعة ٨ ص وحتى ٨ م.. شركات الإستثمار بتشغل البنات في العطلات الرسمية، بتشغلهن في الأعياد وتشغلهن بشكل اجباري. وكثير من البنات ما بيخدوش فلوس اضافي علي ساعات العمل، ولما كنا بنسألهم كنتم بتأخذوا كام علي ساعات العمل الإضافي، البنات ماكنوش عارفين يحسبوها وساعات كانوا يقولوا لأ احنا مبناخدش اضافي.. هم كانوا بيزودوا لنا المعدلات فبتقعد غصب عنا حتي الساعة ٧م، شركات القطاعات الهندسية لم يكن بها هذا التجاوز سواء بالنسبة للقطاعين الاستثماري وقطاع الأعمال وهذا لسبب بسيط ان الشركتين، شركة النصر للتليفزيون من الشركات اللي اشتغلنا فيها كان الإنتاج فيها متوقفا، وكانت بتتجهز للتصفيه، فلم يكن بها شغل أصلا.. شركة المعصرة وشركة بنها هي شركة تتبع الإنتاج الحربي وده قطاع ملتزم جدا بعدد ساعات العمل وما زال بيقيم عدد من المزايا يمكن قلت كثير في شركات قطاع الأعمال الأخرى، بالنسبة للشركات الاستثمارية شركة تليمصر بعد ما اتباعت اللي اشترى الشركة قرر انه يوقف العمل بها ويشغل المصنع بتاعه الثاني الموجود في الإسماعيلية، وكان بيحاول التخلص من العمالة

داخل المصنع بالنقل أو بالفصل وكان هناك مشاكل.. يعني حتي واحنا بنشتغل كان عندهم مشاكل واعتصامات بسبب الموضوع ده.. فبالتالي مشوفناش شركات أوسع من كده في القطاع الاستثماري علشان نقدر نعرف هل هي فعلا كلها بتلتزم بعملية الـ ٨ ساعات ولا هذه حالة عامة؟

بالنسبة للمزايا زي المواصلات والمصايف والسكن والرعاية الصحية والتأمينات ودور الحضانات والوجبات.. هذه المزايا قلت بشدة في شركات قطاع الأعمال.. قبل كده كانت شركات قطاع الأعمال بتوفر كل ذلك كل هذه المزايا.. بعض شركات قطاع الأعمال توفر المواصلات والبعض لا يوفرها.. مازالت تقدم مصايف، لكن مثلا السكن كانت بتقدم للعمال سكن اداريا... الآن انتهى موضوع السكن الإداري.. في شركات قطاع الأعمال مازالت هناك رعاية صحية.. مازالت هناك تأمينات.. لكن وجدنا نسبة كبيرة منعاملات داخل شركات قطاع الأعمال غير مؤمن عليهم... بالمناسبة مسألة التأمينات كانت موجودة أيضا عن البنات اللي بعقود في القطاع الاستثماري لكن كان فيه نسبة حوالي ثلث البنات اللي قابلتهن كان غير مؤمن عليهم في شركات الاستثمار وهذا لأسباب، السبب الأول ان في شركات الاستثمار بيخبروا البنات، نخصم التأمين من الأجر؟... فالبنات بترفض.. لأن هي بتأخذ كام ؟ هي بتأخذ مايزيدش عن ٢٠٠ ج.. فتخصم لها كمان تأمينات.. هتأخذ كام.. ونفس الموضوع في شركات قطاع الأعمال، ان هناك بنات بنشتغل بعقود مؤقتة بترفض.. يعني العقد كله علي بعضه لا يزيد علي ٢٠٠ ج، ٢٥٠ ج.. فتقولك لا انا مستغنية عن التأمين في مقابل الأجر. المواصلات زي ما قلت بعض شركات قطاع الأعمال بتوفرها وشركات الاستثمار بعضها بيوفرها ولكن بشكل اضطراري ومعظمها مواصلات غير آمنة. أقصد المزايا بشكل عام قلت في قطاع الأعمال وتكاد تكون غير موجودة في شركات الاستثمار، الوجبات أيضا بتقدم وجبات للمعاملات بس احنا لاحظنا ان التي تعمل في شركات قطاع الأعمال تفضل بدون الوجبة والتي يصرف لها كوب لبن في بعض الصناعات التي يحتاج ان تشرب العاملة كوب لبن وهي شغالة كي يقلل ذلك من أمراض المهنة بتأخذ بدل كوب لبن. معظم الشركات سواء كانت قطاع أعمال او شركات استثمارية والمصانع اللي بنتكلم عليها مصانع تعتمد في الأساس علي عاملات. جميع الأقسام بيشرف عليها رجال. الرجال هم من يقومون بعملية الإشراف ورئاسة القسم والأعمال الإدارية وأعمال النقل والتوزيع. وهذا ينعكس علي الأجور.. يبينعكس علي المعاملة والعلاقة بالعاملات وعلي أجورهن، وأجورهن بتبقي مرتفعة عن البنات مع ان المجهود البدني العالي وعدد ساعات العمل الطويلة التي

تقوم بها البنات. البنات الحقيقة يتعرضن.. أو العاملات بشكل عام يتعرضن لجملة من المشكلات داخل الشركات. هناك مشكلات عامة في القطاعين، وهناك مشكلات يختص بها كل قطاع.. سنجد مثلا في شركات الاستثمار هناك خصومات شديدة وشهرية علي العاملات تصل الي ربع الدخل.. سنجد صعوبة شديدة في الوصول الي مكان العمل.. وهذه مشكلة عامة عند كل العاملات التي شركاتهن لا توفر وسائل مواصلات وبالذات البنات القادمات من الأماكن الريفية تجدهن راكبات علي جرارات ويتعرضن لحوادث علي الطريق تجدهن أحيانا منقولات في عربيات نصف نقل، تجدهن ماشيات لمسافات طويلة وسط الأراضي الزراعية ولو البنات راجعة الساعة ٧ أو ٨ بالليل ماشية في الأراضي الزراعية ممكن تتعرض للتحرش أو الإعتداء عشان كده البنات كانوا يمشوا في جماعات، البنات ما يمشوش لوحدهم يمشوا مع بعض في جماعات من أجل الحماية.

أحد أهم المشكلات ان مفيش حد يببص علي العقود.. يعني ولا واحدة كتبت عقد وعرفت إيه البنود وإيه الشروط الموجوده جوه العقد..، وأي حاجة بتطلب منها من الإدارة.. يقولوا لها ده مكتوب في العقد.. احنا تقريبا بعد ما خالصنا الدراسة ظهرت لنا مشكلة كبيرة جدا في الإسماعيلية... البنات يشتغلوا بعقود مؤقتة في أحد مصانع الملابس.. المفترض كانوا متفقين علي انهم يشتغلوا من الساعة ٨ ص الي الساعة ٤ م.. فوجئوا بان المعدلات بتزيد وتصل ساعات العمل الي الساعة ٧ م.. فقالوا مش هنشتغل هنمشي.. فلكشفوا انهم ما يقدروش يمشوا لانهم ماضيين علي شرط جزائي ٥ آلاف جنيه وما يقدروش يشتغلوا في شركة اخرى الا بعد ٦ أشهر.

شركات الاستثمار بتتافس بعضها ويتخطف من بعض البنات فبقت بتحط شروط جزائية علي العاملات وهما بيمضوا العقود، طبعا فيه كمان مشكلة خطيرة بتتعرض لها العاملات في كل القطاعات وهي أمراض المهنة.. يعني معظم العمل بيتم وهم واقفين علي رجلهم فتجلبهم دوالي مع طول ساعات العمل، يا أما قاعدين فيصابوا بمشكلات في العمود الفقري والرقبة .. يا أما يتعرضوا لحوادث المعدات.. يعني في الغزل والنسيج هتلاقي بعض المقصات والمكاوي والإبر.. وهما ممكن يقولونا اكتر من كده... مثلا المنظفات كنا بنشوف البنات بيحضروا سم الفئران بأيدهم. مفيش كامات بتتحط علي البق. عاملات الفرقة مثلا قاعدين في زغب القطن.. في العنابر الكبيرة دي مفيش كاماة، مفيش غطاء علي الرأس، مفيش أي اجراءات للسلامة... في النهاية فيه مخاطر بتتعرض لها العاملات.. فيه ضعف في اجراءات السلامة المهنية.. فيه غياب شديد في الرقابة.. يعني الأجهزة الرقابية تكاد تكون متعرض



حاجة عن المصانع دي أو مبتزلهاش. وطبعاً عدد كبير من العاملات اللي احنا قابلناهم كان عندهن أمراض صدرية وأمراض خاصة بحساسية الجلد بالذات في شركات المنظفات وفيه عاملات تعرضن للإجهاد في شركات الأدوية في أقسام الحبوب الي آخره. اللجان النقابية طبعاً مش موجوده في شركات الإستثمار وبالتالي دي إحدى المشاكل اللي بتواجهها العمالة الجديدة بشكل عام والعاملات بشكل خاص.. مفيش آلية للشكاوي.. مفيش آلية للمطالبة بحقوق، لأن مفيش تنظيم أو لجنة نقابية ممكن تلجأ لها العاملات.. فيه دايماً الخوف من عدم التجديد والفصل.. يعني دايماً بتتم عمليات الفصل والنقل الجماعي وده لكل العاملين بعقود مؤقتة سواء في شركات قطاع الأعمال أو في الشركات الإستثمارية.. كلهم عنده الخوف من عدم تجديد العقد أو الخوف من الفصل.. في شركات قطاع الأعمال عندها مشكلات خاصة ذي المشكلات الخاصة بتصفية بعض المصانع ونقل العمالة أو تسريحها.. عندهم مشكلات ذي الحرمان من العمل في ساعات اضافية.. عندهم مشكلات في الحرمان من الحوافز والأرباح.. الخ. كمان مفيش آليات للتفاوض. ودي تقريبا كانت معظم المشكلات اللي بتتعرض لها العاملات بعد تطبيق سياسات الخصخصة في شركات قطاع الأعمال أو القطاع الإستثماري.. حقيقي ما عنش فيه فرق بين العاملات في كل من القطاعين بسبب العقود المؤقتة وعدم التثبيت.. وأنا بانهي احب ان احنا نتكلم عن.. فكرة ان مهم جداً كيفية تنظيم العمالة الجديدة دي وكيفية حمايتها وكيفية بلورة برنامج ممكن يتوحد عليه كل فئات العمال.. وأيه اللي ممكن تقوم به الجمعيات الأهلية.. ومعنا عدد من الجمعيات الأهلية الموجودة واحنا كمان جمعية أهلية.. إيه اللي ممكن نعمله لتبني مؤسسات المجتمع المدني قضايا العاملات في مصر. وشكراً.

\* نولة درويش: شكراً هالة وانتصار.. أعتقد الحقيقة أن معظم الكلام اللي انتوا سمعته كلكم عارفينه كواقع.. لكن ربما أهمية هذه الدراسة أول دراسة من نوعها في هذا المجال.. وخاصة بالنساء.. أنا لفت نظري ان انتصار ما اتكلمتش عن التحرش الجنسي وخصوصاً الستات في المصانع ودي مسألة خاصة جداً بالنساء.. يعني ده الجزء الخصوصي جداً الخاص بالنساء.. الحقيقة ان الهدف من هذه الندوة .. ضمن سلسلة ندوات حول هذه الدراسة.. هي ان انتوا اللي تعبروا وتبلوروا التوصيات والمطالب.. يعني المستقبل.. الدراسة دي مش معموله عشان احنا نعرف اللي بيحصل وبس.. الدراسة دي من ضمن ما يسمي بالدراسات الموجهة نحو التغيير، وبعقدت انتم اصحاب القضية.. هتبلوروا بطريقة اكيد افضل من أي حد فينا، واحنا مش قاعدين في المصانع

لكن عندنا كل التعاطف وكل هذا الإهتمام.. الحاجة اللي برضه كنت عايزة أقولها ان عام ٢٠٠٧ شهد طفرة في المشاركة النسائية علي مستوي الحركات الإجتماعية في مصر.. ولاحظنا الحقيقة ان الستات كانوا منورين في الإضرابات العمالية.. لأول مرة الستات ماكنتش بس دورهم داعم للرجالة.. مش يروحوا ويحضروا الأكل ويجوا المصنع عشان يدعموا الرجالة.. لأ كانوا هما اللي علي راس الحركات الإحتجاجية وده شيء مبشر جدا.. وعشان كده احنا بنسميهم ستات مصر الجدعان.. دلوقتي احنا هنسمع لكم. أرجوا ان كل واحد يتكلم بس يقول اسمه في الأول للتوثيق.

\* السيد حبيب من عمال غزل المحلة: انا كان لي ملحوظتان علي هذا التقرير.. الملحوظة الأولى المفروض أن يكون التقرير مع كل واحد منا قبل هذا الإجتماع، الملحوظة الثانية المفروض كان هذا البحث يجيب دور العاملات في النقابات.. هو ماتكلمش في النقطة دي علي اساس ان مستقبلا لازم يكون العاملة لها دور في العمل النقابي والعمل في مجلس الإدارة، دي نقطتين ما اتكلمتش عنهم الأستاذة انتصار.. فانا بالفت النظر لإضافتهم الي هذا للبحث وشكراً.

\* وداد الدمرداش عاملة بغزل المحلة: معايا نموذج هنا من القطاع الخاص الأنسه مني لأول مرة تحضر معنا حاجة زي كده.. دلوقتي لما حضرتك بتقولي القطاع الخاص لما بيصفي بيمشيها ويقعدها وكلام من ده.. ده حصل بالفعل مع البنات دي.. يعني هو بيشغلها زي ما حضرتك بتقولي ب ٣٠٠ ج أو ٤٠٠ ج ... الخ. يجي اخر الشهر يديها ١٥٠ ج، ٢٠٠ ج.. اصبح انها اشتغلت عنده ببلاش.. دي حاجة.. الحاجة الثانية ان حضرتك بتقولي المفروض بيقى في المصانع كوب لين.. ده المفروض لكن حاجات كتير ناقصة... فى جميع القطاعات.. الأعمال والخاصة والعام...الخ، فيه حاجة كمان اسمها شفاطات بتتركب.. بتتعمل لشطف الغبار أو الهيو.

اما دور المرأة.. احنا كان لنا دور كبير جدا في الإضراب، الرجالة دول كانوا هما الأساس، لكن احنا دورنا كسيدات مع الرجالة.. احنا كان دورنا ان احنا في ظهر الرجالة دول بنسندهم.. المفروض لا يبقى فيه خوف ولا يبقى فيه أي تراجع.. واني مثلا اخاف ان انا سيدة لأ ماينفحش.. انا أروح اقف وسط الرجالة.. انا بنأشد أي امرأة النهارده انها ما تخافش من أي حاجة خالص.. وتشارك.. احنا تعرضنا لضغوط كتير ومن بيوتنا شخصيا.. كمان لأن كان عبء جامد علينا برضه فيه شغل.. فيه اضراب.. فيه تفاوض بس احنا ما اترجعنا.

\* محمد العطار من عمال غزل المحلة: هي الأخت وداد اتكلمت باختصار جدا عن دور المرأة العاملة في غزل المحلة في الإضراب، وقالت انها كانت خلف الرجل.. لأ.. أنا بأكد انها كانت قدام كتير قوي من عمال غزل المحلة.. كانت هي في الأمام.. وأنا أشهد علي هذا بكل ما أملك.. وديه حقيقة.. دور المرأة العاملة في غزل المحلة علي مدي الأعوام السابقة بصورة ملحوظة جدا .. أول شيء انها كانت في اضراب ديسمبر ٢٠٠٦ كان لها دور.. اللي هي قالت.. خلف الرجل.. بتحمي ظهره، ولكن تطور هذا في إضراب سبتمبر ٢٠٠٧، وأصبحت هي في الأمام بجانب الرجل تماما ملاصقة كتفا بكتف.... دي حقيقة ولازم نقرها، الحاجة الثانية ان هما كان لهم الدور الأبرز في قوة الرجل نفسه.. لما يشوف الرجل اللي هو عايز يمشي.. انتوا عارفين طبعا الطبيعة المصرية بيزهق بعد يومين او ثلاثة.. طول ما الست قاعدة او العاملة قاعدة.. الراجل غصب عنه بيضطر انه يقعد.. فده انا شوقته ميدانيا.. الحاجة الثالثة ان كان لها دور بارز جدا في التفاوض.. الستات او العاملات فرضوا انفسهم علينا احنا كرجال.. فاحنا بدأنا ناخذ منهم العناصر الكويسة وناخداهم معانا في التفاوض.. يعني احنا كمجموعة خمسة او ستة رجاله كقيادات عمالية لهذه الشركة الضخمة، وكنا بنسافر بانفسنا ونتفاوض وعلي مدي سنة كاملة. لما هما فرضوا انفسهم علينا قولنا ليه لأ.. لما يبقى لهم دور في التفاوض بالعكس.. دا هما كان لهم دور بارز جدا في حق المرأة.. لما اجي اتكلم عن حق المرأة هتكلم عليها هامشيا خارجيا.. لما نتكلم عن دور العاملة وحقا.. هنتكلم عليه جوهريا.. وهذا ما حدث تماما في التفاوض في الإتحاد العام وفي النقابة العامة.. وقادته الأخت وداد والأخت أمل وهما من الحاضرات بيننا الآن.. وكان لهما دور بارز جدا لدرجة ان رئيس الإتحاد شكرنا احنا كرجالة ازاى وصلنا البنات دي لهذا المستوي الرائع من قوة التفاوض والتمسك بحقوق زميلاتهن العاملات.. كمان كان لهم الدور الأبرز اقوي مننا في ثلاث حاجات.. العامل او القيادي العمالي او العامل اللي هو متمسك باعتصامه وحقوقه وحقوق زميله كان بيهتف وبينظم.. احنا كان لنا ادوار كثيرة داخل الإعتصامات.. هما كان لهم نفس الأدوار يضاف اليها دور الوجبة هما كانوا بيخرجوا وبينظموا انفسهم ان فيه ستات بتقعد وستات بتروح بيوتهن وتجهز وجبات علي نفقتهن الخاصة ويجيبوها وجبات ساخنة للعاملين والعاملات المشاركة أثناء الإعتصام.. هو ده كان الدور البارز قوي في اضراب سبتمبر.. وأيضا المشاركة في اللوقات الاحتجاجية كان لها الدور الأبرز.. يعني افكر ان في وقفة ٢٠٠٦/٧/١ كانت الأخت أمل كتير قوي من الرجالة سابوا الموقع ومشيو.. وانا ما ببخسش في حق الرجالة.. هما طبعا كان

لهم دور قوي.. لكن كانت هذه السيدة العاملة وقفت بقوة امام فطاحل الأمن.. وامن الشركة.. وقالوها مغيش حد جه قالت لا الناس دي جاية طالما الناس دي وعدت يبقي هتيجي.. لدرجة ان البوابات اتفتحت بدري حوالي ٥ دقائق ودي سابقة لم تحدث في غزل المحلة.. الا ان هي اصرت هي وزميلاتها ان يقفن لغاية احنا مانيجي بالمجموعة اللي هتعمل الوقفة الإحتجاجية، كمان في التظاهر الخارجي خارج اسوار الشركة كانت الأخت أمل صاحبة الانتفاضة والشرارة دايما حقيقة كان لها دور بارز جدا في قيام الإنتفاضة ذاتها لدرجة انها تعرضت للإهانة والضرب ولم تخف

\* نولة درويش: شكرا جزيلا.. انا في الحقيقة عندي سؤال لو حد يقدر يشرح لنا ازاى حصل هذا التطور.. يعني انا فهمت انه حصل تطور من الدور المساند الي الدور الفاعل. مهم ان احنا نفهم ازاى وليه هذا التطور. هل فيه ظروف جدت ؟ هل فيه أي شيء.. أنا سامعه ان عم سيد ممكن يرد علينا في الموضوع ده.

\* السيد حبيب: بالنسبة للعاملات في غزل المحلة ففي اضراب سنة ١٩٧٥ لم تشارك المرأة الا في أول يوم، وفي اضراب سنة ١٩٨٦ برضه لم تشارك الا أول يوم، و١٩٨٨ بتاع منحة المدارس برضه لم تشارك الا في أول يوم. نيجي علي اضراب ديسمبر اول مرة العاملات يشاركن بالاضراب بشكل جيد جدا او بشكل فعال، هما طبعا انتقل عليهن المصانع لما انتقل عليهم المصانع بدأ العمال الرجالة يروحوا يفتحوا الأقسام عليهم وينزلوهم بقوا محافظين علي المصنع كان هذا المصنع ملكهم، يعني هم اصحابه.. يعني هنضرب مثال ان العاملات دخلن علي قسم كيماوي فيه اقمشة بكذا مليون متر، والاقمشة دي في المواد الكيماوية قدامهم ٤ ساعات علي ما يخلصوا هذا الكم من المليون متر، هما حرصوا العمال اللي هي بتشتغل الممكن علي ما يخلصوا وبدأو يوقفوا الممكن لعدم خسارة الشركة كذا مليون متر قماش، لما بدأو يتحركوا في ديسمبر فعلا كان بشكل فعال جدا وكان لأول مرة يمكن انا شاركت في كل الاضرابات من ٧٥ الي سبتمبر ٢٠٠٧ كان لها دور اكبر في ديسمبر، كانوا طبعا احنا في الوقت ده في رمضان كان العمال والعاملات صايمين، كانت العاملات يقسموا انفسهم كل يوم مجموعة يروحوا يعملوا اكل للعمال والعاملات في بيوتهم علي نفقتهم الخاصة، بدأت المشاركة فعلا للعاملات في التفاوض، بدأت في انها تروح تتفاوض باسم العمال عامة.. باسم عمال مصر كلها، حسينا فعلا ان المرأة بدأ فيها تطور وان شاء الله في ٤/٦ هيكون لها دور اكبر وأكبر وشكرا.

\* أمل محمد السعيد، عاملة بغزل المحطة: طبعاً حضراتكم عارفين الظروف المعيشية اللي احنا فيها دلوقتي.. والغلا اللي احنا فيه.. ده السبب القوي اللي دفعنا ان احنا نقول عايزين اعتصام... عايزين الناس تفوق.. ندور علي حقوقنا فين ونطلبها طالما احنا ساكتين مبوصلش لأي هدف.. مبوصلش لأي حلول.. يبقى لازم وقفة.. تبقي وقفة صح كمان. دي اول حاجة دفعنا ان احنا نكون وراء زميلنا العمال العزاز دول والأقوياء دول، والتي شوقنا الخير علي ايديهم كله، وده السبب القوي والدافع القوي اللي خلانا قلنا اضراب ماشي بيات ماشي، مفيش مشاكل لان احنا دلوقتي بنعمل لأولادنا والايال القادمة، لان ما مات حق ووراءه مطالب.. طول ما احنا بنطالب بحقوقنا.. ان شاء الله هنوصل لها.. ده كان السبب الأدعي للإضرابات، لان احنا متعودين علي الزيادة بتاعة شهر ٧ اللي هي متدنية للغاية. دي اللي ما بتعملش حاجه في أي حاجه وكنا بنحمد ربنا علي كده، لما نوصل بقي دلوقتي لحالة زيادة الاسعار تبقي يوميا.. او يمكن تقولي حضرتك كل ساعة تسمعي اسعار جديدة، فلانم يبيقي فيه وقفة.. احنا فين من الحكومة دي.... مشكلة الحضري اتحلت واخذ كام مليون لوحده.. مع العلم لو رجال الأعمال اللي اتبرعوا للحضري دول لو شافوا مشكلة زي اللي احنا فيها دلوقتي، احنا قفنا الوسطية.. يا فوق قوي يا تحت قوي.. فدي حاجة من ضمن الحاجات اللي بتخلينا نحزن، لان احنا المفروض امة وسط، فاحنا لما نفقد دي يبقى خلاص قول علي الدنيا ياالله السلام، فاحنا دلوقتي نتكلم من منظور الحياة الصعبة اللي احنا عايشينها، وعشان ولادي، وكل الجيل اللي جاي.. الحكومة مش مننا عامة، هما مش عايشين اللي احنا عايشينه.. هما عايشين عيشة مرفهة مش مخليهم حاسين بمعاناة الشعب، احنا مشكلتنا راسا من الحكومة علي طول، فهي تتحل من فوق من عندهم.. ما تتحلش خلاص يبيقي الوضع كما هو عليه، طبعاً بيدخل كده شائعات في وسط العمال عشان يهبط من عزائم العمال.. بس احنا الحمد لله أوعي من انهم يعملوا حاجه زي كده، وكان في احدي المفاوضات مع النقابة العامة واحد منهم مثل لنا الشركة بالبيضة والفرخة، الفرخة هي الشركة والبيضة دي هي اللي هناخده من وراءها. بس انا رحنت رادة علي حضرته وقلت له انت دلوقتي حضرتك بتمثل الشركة بالفرخة، انا برضه اللي بحط للفرخة الأكل عشان الفرخة تقدر تبيض. لأن العمال هما اللي بيتنجوا، عمر الفرخة ما هتبيض من غير اكل، فاحنا لازم مدام كلنا بنكمل بعض احنا دلوقتي حضرتك ما بناخدش البيضة.. احنا بناخذ القشرة.. مفيش.. ياريت تبقي حضرتك عنصر محايد معانا.. ليه لأن احنا دلوقتي في أزمة.. انت بعيد كل البعد عن اللي بيحصل حالياً وياريت ماتتعبناش.. احنا عارفين مصيرنا وعارفين

حقوقنا وعارفين سكتنا وماشين فيها الي الآخر.. طاب يعني أياه.. يعني ان شاء الله نوضع حلول.. انا عايزة أناشد السيد الرئيس محمد حسني مبارك شخصيا.. انا عايزة أوصل له صوتي انه شخصيا.. يقعد مع العمال ويشوف مشاكل العمال.... ومتقولناش اعتصامات بيبقي بره.. احنا اعتصامنا هنا لأن مطالبنا من هنا.. ومطالبنا شرعية.. فده كل اللي حصل وان شاء الله ان محصلش حلول قيل ٤/٦، بندعوا حضراتكم بالمشاركة طبعاً، لو مش هتشاركوا معنا في الإضراب بيبقي حتي بالروح، بالتضامن معنا، وشكراً.

\* عائشة أبة صوماده مصنع الحناوى للدخان بدمنهو: طبعاً بنشكر عمال وعاملات شركة الغزل والنسيج لأنهم مثل مشرف لعمال مصر كلها.. طبعاً إحنا قطاع خاص لكن إحنا منذ سنة ٢٠٠٣ حتى الآن مابندخس علاوات ولا منح، كنا سالكتين وسكتنا ونسيناه، إتكلمت أنا مع صاحب الشركة قولنا له إحنا حنسيك في ٢٠٠٣ بحيث إن انت كده بتقول أنا راجل متعثر حنسيك سنة بس تلتزم بالعلاوة، أما المنح هنصبر عليك ٣ سنين في خلال الـ ٣ سنين هتجزأ لنا مثلاً المنحة بتاعتنا، إحنا لينا ١٥٪ على مدار السنة، قال لى أنا علوزه منك تخليك في حالك وانك انتي تنسى خالص علاوة شهر ٧ العلاوة الاجتماعية سيناه في ٢٠٠٣ جينا في ٢٠٠٤.. جينا في ٢٠٠٤ رفعا دعوة بالمتطلبات بتاعتنا العلاوة والمنح.. في ٢٠٠٥ تفضلت النقابة العامة مشكورة بعد ما عملنا إضراب يومين جت لمقر الشركة وحقيقى أنا الوحيدة اللي حضرت التفاوض كنت عاملة عادية.. فالمهم اتكلمت معاهم وطلبت الحد الأدنى لمطالب العمال.. لقيت مفيش أى استجابة من الادارة فالنقابة تفضلت مشكورة وكانت متمسكة بالحد الأدنى لحقوق العمال، إلا أن الشركة قالت أنا متعثرة، طب قدى ما يفيد إنك إنت متعثرة.. الشركة ما قدمتش أى مستند.

انا استغربت إزاي طالما ماقدمتش الشركة أى مستند إزاي النقابة ما اتخدتش أى اجراء قانونى ضدها.. يعنى المفروض غرامة.. اشمعنى لما العامل بيغلط بنعمل له جزاء بالثلاثة أيام والـ ٥ أيام.. امال لما صاحب رأس المال غلط فى حق ألف عامل مفيش أى جزاء له.... النقابة تفضلت مشكورة ورفعت لنا دعوة بالمطالبة بعلاوة ٢٠٠٥ إلا إننا فوجئنا في ٢٠٠٦ بصيت لقيت إن الإدارة لما طلع للعمال حكم قضائى وإن هى هتتفد طلبت تتفاوض، رحنا نتفاوض ولكن من غير أى فائدة واستمر التفاوض لحد ٢٠٠٧ وانا اصبحت عضو لجنة نقابية ورغم كده ما كنوش بيحضر وني

اجتماعات اللجنة... طبعا اشتكيت وحضروني.. النقابة بادية في ٢٠٠٦/١١ أول حضور جلسة معاهم حضرته يوم ٢٠٠٧/٢/٢٨ يعني من ٢٠٠٦ وأنا ملحضرتش معاهم أي اجتماع لجنة.. إلا بعد شكاوى... لقيتهم مشيعين لي إخطار إن أنا أحضر يوم ٢٨.. حضرت يوم ٢٨.. أثارهم كانوا محضرني مش عشان أحضر كعضو لجنة نقابية لأ عشان إن هم يفتعوني ان أنا أرضى بالتفاوض.. فلأسف يعني أنا رفضت تماما لأن إزاي يعني حقوق عمال من ٢٠٠٣ حتى تاريخه أقبل ان العامل يأخذ ٥٠ جنيها تتحطه على الأجر الشهري بدلا للعلاوات ٤ سنين وانسي خالص المتجمد يعني العامل بدل ما كان له مثلا ٥ آلاف جنيه خلال الـ ٣ سنوات لأ أنساهم .. لقيت الضغوط على زميلتي إللي نقلت الإسكندرية وتسافر ٢٠٠ كيلو ويتروح يعني بتطلع من الساعة ٧ الصبح تروح ٩ مساء وبتمشي في طريق زراعي ٢ كيلو يعني واحدة زي دي لو طلع عليها ناس بالليل تعمل إيه.. وقلت لهم وقلت لصاحب الشركة دي هتبقى اهانة لنا يعني حقيقي فضيحة لنا احنا كشركة لما ابص الأقي في الجرايد صابحة الصبح فلانة الفلانية طلع عليها مثلا شباب وطلعوا عملوا كذا فضيحة لشركة الحناوي.. إزاي تقبل إن واحدة أم طفلة تسافر وتطلع من الساعة ٧ الصبح لحد ما تروح الساعة ٩ مساء وتسبب طفلة عندها سنة ونص أو سنتين وياريت على حد كده ده هي قاعدة في حجرة ٣ متر في ٣ متر في وسط ١٥ راجل إزاي انت توافق على كده حتى العاملة لو اتحركت هتتحرك بلجراج وإزاي انها بتقعد من الساعة ٧ الصبح الى الساعة ٩ مساء حتى من غير دورة مياه تقعد إزاي من غير ماتخش حتى حمام وكذلك برضه عاملة تانية ناقلها من كفر الدوار نفس النظام والللي نقلت في كفر الدوار عندها نسبة اعاقة في عينيها المهم لما اتكلمت مع صاحب المصنع في حكاية العمال قال الللي أنا عاوزك تخليك في حالك.

رغم ان انا شاركت في التفاوض فوجئت ان اللجنة النقابية طلعت قرار بتجميد نشاطي، اتصلت بالنقابة العامة انا ازاى يتجمد نشاطي وأنا حضرت تفاوض قالوا ده راي مجلس ادارة طب قولولي انا عملت ايه، قالوا انت اسأت للشرف النقابي، ايه هو الشرف النقابي في رأي حضراتكم الشرف النقابي ان انا اشوف عامل ما زادش مرتبه من ٢٠٠٣ وحتى تاريخه، وصاحب العمل عمال يغير عربية كل يوم والثاني والعامل مش لاقى ربع كيلو لحمه ياكله ... والمنحة ما تصرفهاش الا العمال الللي مش شاكيين والعمال الللي انتازلوا، احنا كنا ٢٠٠ عامل شاكيين صفيينا على ٦٠ عاملا، والعمال الللي انتازلوا دول بضغوط.. الللي عايزه أجازة رعاية طفل وإللي عندها ابنها تعبنا

يقولوا لهم انتازلنى واحنا نديك إالى انت عايزه ويعد مايتنازل مانعرفكش..... فوجئت إن فيه واحدة تالئة برضه حولوها لفصل دى عاملة يعنى من كثر الضغوط من الشركة ومن الإدارة على العمال البننت دى اللى حصلها حالة نفسية.. إتهموا العاملة دى أن عطلها خلاص وحولوها لجنة خماسية...آخر حاجة عملها صاحب العمل مع العمال يوم المولد النبوى الناس بتقول كل سنة وانتم طيبون وهو جه وأعطى خمسة أيام لكل عامل ما عدا العمال اللى شاكيين صاحب العمل، وكمان ممنوع يحصلوا على خطاب تحويل للتأمين الصحى ولا اجازة مرضى.

المهم طبعا أنا جيت اتصلت برئيس اللجنة النقابية طبعا هو عارف إن أنا متجمد نشاطى... بقوله عملت ايه للعمال، قالى عملت ايه للعمال فى ايه، قلت له أنت عندك العمال اللى ما خدوش ٥ أيام أنت دلوقتى بتميز، قال بميز يعنى ايه قلت له دلوقتى إحنا الاتفاقيات كانت على السنوات التى فاتت إحنا فى ٢٠٠٨ وخلينا نبدا صفحة جديدة وأنت أصرف للعمال كلها زى بعضها...فأنا دلوقتى بعد إذن حضراتكم إحنا عايزين مساندة إحنا عايزين تشكيل لجنة من إتحاد الصناعات عشان تحديد الكمية اللى من المفروض ينتجها العامل لأن العامل كده زى ما يكون شغال فى طاحونة، وهو شغال مهوش عارف الكمية اللى عليه وعايزه برضه من المجلس القومى للاجور عشان يفتش على الاجور بتاعة العمال عشان يشوف أجر عامل شركة الحناوى وصل لفين.

\* إحدى العائلات من شركة الحناوى: دلوقتى إحنا لما وقفنا وعملنا إضرابات أهاتونا وفى إتصالات راحت لبيوتنا ورجالتنا واصطادوا العمال واحد ورا واحد عشان يروح يتنازل عن القضية بتاعته، والعمال للأسف.. يعنى عاملة بقالها ١٤ سنة خدمة ويتاخد ٢٥٠ جنيه فى الشهر معاها مواصلات بيت ورعاية حضانات ودروس تعمل ايه من كل ناحية ما ينفش مع غلو المعيشة اللى إحنا فيها طبعا، غصب عنهم انهم تنازلوا، وكمان تحت ضغوط اتعمل لها جزاءات تبدأ من ٣ أيام وحتى ٥ أيام خلصوا من الجزاءات، قالوا بعد العيد هنتنقلوا زى زميلكم ما انتقلوا الجماعة اللى هما شاكيين، حتى بعد العيد لقينا خصم ٥٠ جنيه و ٦٠ جنيه لكل واحد ليه ده ؟ قالوا ده تأخيرات كانت من سنة ومن سنتين ومن شهر ومن شهرين ده كل شهر هينخصم حاجه زى دى، فطبعا إحنا سكتنا، واحنا فى احتياج للـ ٥٠ جنيه بس سبحانه من صبرنا والهمنا القوة، فالمهم نزل صاحب العمل واتكلم مع العمال تحت وقال ياجماعة ايه نتفاوض



أو كده والاتفاقية كويسة عشانكم ولصالح الكل فقعدنا معاه قعد يقرأ وقال هنجيب بتورع النقابة قلنا له احنا مش هنتنازل لما نشوف المحامى بتاعنا لأن المحامى هو الذى هيدلنا على الصح والغلط إحنا ماعدناش عارفين لكم صح ولا غلط، قال أقول لكم خلى الشاكى شاكى والمتنازل متنازل.. ورحنا قعدنا مع المحامى وشرحنا له الموقف، احنا الواحدة التعبانة مننا بتأخذ جواب تأمين صحى بنروح التأمين الصحى بيتنقل عمال الحناوى متوصى عليهم.. ممنوعين من الاجازات والعلاج طب احنا نروح لمين نكلم مين...

\* هناء عثمان من جمعية المستقبل ببرج العرب: أنا مبسوفة قوى قوى أن الاقاليم فيها ستات بتدافع عن حقها فى العمل، كمان برج العرب فيها مشاكل كثير قوى بالنسبة للمصانع، لدرجة أن احنا كنا عاملين مشروع اسمه مكافحة البطالة وتشغيل الشباب فى الجمعية كنت بودى السيدات المعيلات عندى فى الجمعية عشان يشتغلوا فى المصانع دى كانوا بيحجوا يحكو لى اللى هما عايشينه فى المصانع والتحرش الجنسى اللى بيترضن له.. اختيار عمال المحلة ليوم ٤/٦ اختيار مش أى كلام مش أى حد اللى يختاره على فكرة لأنهم عارفين من اين تؤكل الكتف لأن انتخابات المحليات ٤/٨ ده عشان تأثيره يكون قوى.

\* نولة درويش: ولوقتى يا جماعة هحاول نطلع باهم الحاجات اللى اتقالت.. الحقيقة فى بعض الكلام من اللى اتقال حول البحث وتوصيات لتقوية البحث، واحنا عندنا مرحلة تانيه من هذا لبحث هتبدأ فى خلال شهر او شهرين فى مزيد من المناطق. الملاحظات اللى اتقالت الاساسية حول البحث انه كان المفروض ان ملخص البحث يكون بين ايديكم قبل القاعده ديه، وديه ملاحظه نهبطها فى الاعتبار فى بقية الندوات، وطبعاً احنا فيه خطه ان النتائج الاساسية للبحث تعرض فى مؤتمر صحفى، ايضاً كان هناك ملاحظة تانيه مهمه انه كان ممكن الاشارة الى دور العاملات فى النقابات لكن من الواضح انه هذا الدور كان دوراً ضعيفاً جداً باستثناءات بنسمعها لولقتى او سمعناها فى الشهور الماضيه، ايضاً من التوصيات التى طلعت توسيع نطاق البحث وخاصة كان هناك دعوة من برج العرب ان نذهب لهذه المنطقه، واعتقد ان ده من ضمن الخطط القادمة بالفعل، السمة الواضحة من كل الكلام انه فى تطور فعلى فى دور النساء فى المشاركة فى المطالبه بالحقوق الاقتصادية والاجتماعية والسياسية بالطبع، وان هذا الدور بالنسبة مثلاً لغزل المحلة كان واضحاً جداً فى

الوقوات الاحتجاجية وفي التظاهر خارج الاسوار.

طبعاً من ضمن الحاجات اللي فهمناها أن تطور هذا الدور ارتبط بتدهور الظروف الاقتصادية والاجتماعية، ولكن من المهم انه ما يرتبطش باستمرار هذا الدور بتدهور الظروف الاقتصادية ولكن بتنامي الوعي باهمية المشاركة النسائية...ايضا كان فيه من ضمن الظروف اللي انا على الاقل استفدت منها ان الصمود والاستمرارية بتجبر الحكومة على انها تقدم بعض المكتسبات يعني مش بالضرورة كل المكتسبات....من الدروس المهمة جدا ان اهمية التضامن، والتضامن مش بس بين عمال قطاع واحد ولكن بين العمال عموماً وبين الناس المنحازين لمصالح الطبقة العاملة والعمال. احنا لنا تجربة في "المرأة الجديدة" احنا منظمه نضاليه برضه لما جينا نسجل الجهات الامنيه اعترضت علينا في الاول، والحقيقة صمدنا وقدرنا نقف على رجلينا بفضل التضامن ودي كانت خبره مهمة جدا.

معظم النساء العاملات ما بيعرفوش حقوقهن ما عندهمش فكرة عن حقوقهن وبالتالي ده بيحدد لنا على طول احتياج معين في الشغل مع العاملات في التعريف بالحقوق، والتغلب على السكوت او الخروج من السكوت وده عملية مهمة جدا وبرضه الصمود والاستمرارية وكذا.... من ضمن الحاجات اللي كانت لافتة واحنا عارفينها بس في تأكيد عليها انه فيه طول الوقت محاولات لتفتيت حركة الطبقة العاملة وافساد ناس وشراء ذممهم ودي عملية مهم جداً يجب الانتباه اليها.

\* هالة شكر الله: اعتقد انه مهم جداً الانتباه للنقطة ديه ايضاً من الحاجات اللي عجبتي اوي في كلام عائشة هي عدم خيانة ثقة العمال والزملاء، وده درس مهم جداً لو ان الناس انتخبتي فمهم جداً ان احافظ على ثقتهم، وفي نفس الوقت برضه من كلام عائشة ان الشرعيه الحقيقيه بتيجي من القواعد مش من النقابة اللي ممكن تبقى صفراً اللي ممكن تبقى مشتراة او..... الحقيقة كمان كان فيه شئ مهم اتكلمت عنه مدام هناء هو اهمية تبادل الخبرات والتعلم من بعض، طبعاً احنا مش هنحل المشاكل كلها في القعدة ديه ولكن انا بأقترح شخصياً مثلاً ان الزميلات من مصنع الحناوي ممكن يقعدوا معاكم ويستفيدوا من خبراتكم اكثر وتساعدوهم على انهم يوصلوا، قصدي ان كل الناس بتتعلم من بعض وشكراً.

\* انتصار بدر: يعني انا في حاجتين الحقيقة بجانب موضوع الخبرات طبعاً رايي اننا محتاجين لقاءات اوسع من كده مع ناس من مناطق مختلفة، كمان لهم خبره لان

هي ديه اللي بتشكل او اللي بتندي شكل تنظيمي، لو احنا بنتكلم على ازاي نجمع بعض وازاي نبتدي تبقى مصالح مشتركة ماهياش بس المحلة ما هياش بس الحناوي ما هياش بس حنة الحوافز دي أو الوجبة، لكن فيه حالة عامة بتخص كل الناس ديه، فانا في رأيي اني ديه حاجة ممكن نشوف ونحاول نعملها ازاي الحاجة الثانية اللي هي ازاي ننتقل من المعركة الصغيرة للمعركة الحقيقية انا بتخافق على الحافز ليه لان اجري ضعيف، انا بتخافق على العلوة ليه لاني ما عنديش اجر وديه بقي معركة تخص الكل، انتم النهارده فيه المجلس الاعلى للاجور اللي هوه بقالة خمس سنين متشكل ومعملش حاجة لغاية دلوقتي ازاي فعلا نبتدي نبلور طلب يخصص الاجر. انا ماليش دعوة بالانتاج والله المصنع مشغلني من الساعة كذا الى الساعة كذا انا مالي بينتج ولا ما بينتجش بيخسر ولا ما بيخسرش انا باشتغل في حاجة اسمها اجر عادل ليوم عمل، لكن تجيبني تشغلني ويعدين تقولي أنت مالكيش قيمة في عملك انا اصلي منسية، فلانم تبتدي تبتلور مطالب تجمع بين كل الناس عشان فعلا تبقى عندك حركة بتجمع الناس دي كلها. الحاجة الثانية اللي انتم طرحوها اللي هي ازاي تبتدي تشكل الروابط نوادي حتي في المصنع الناس تتجمع وتكلم عن المشاكل دي وتبقي منتظمة في قعداتها فتبقي دي تقوي، يعني أنت التجربة اللي عندكم يا عائشة فيه ناس ضعفت لان أي معركة بتخليها حتما في ناس بتفضل اقوياء وناس هتضعف بس اللي بيقوينا كلنا ان احنا بنبقي مجتمعين مع بعض ده من الحاجات المهمة.

\* منيرة صبرى، منسقة وحدة التدريب بمؤسسة "المرأة الجديدة": كلامكم النهاردة كان كلاما جميلا جدا جدا.. قبل كذا عملنا شغل مع نساء في منظمات كثيرة خاصة بالحقوق عموما للنساء، ومن كلامكم النهاردة الواحد استكشف كثير من الموضوعات اللي ممكن تكون مهمة لكم زى الحقوق والتضامن مع الاخرين والتشبيك مع الاخرين ومهارات التفاوض واحنا كمرأة جديدة ممكن نحاول مع بعض نقدم حاجة بالشكل دا.

في حاجة اتقالت عن الحقوق الصحية والحقوق الاقتصادية وحقوق العمال واضح ان انتم قيادات وعارفين انما ممكن يبقى فيه آخرون وراكم في اماكن عملكم في مؤسساتكم محتاجين التضامن ده ومحتاجين القوة اللي عندكم دي مزيد من المعلومات ومزيد من المعرفة. انا شايعة كثير من الموضوعات اللي طرحت تبقي موضوعات لتدريبات مختلفة احنا في "المرأة الجديدة" ممكن نحاول مع بعض نقدمه بمساعدتكم لانا واحنا نفس الحكاية نشوف مين افضل حد بيدي تدريب في المسألة دي وخصوصا

حاجة زي حقوق العمل والحقوق الاقتصادية زي حقنا فى التنظيم للدفاع عن نفسنا زي ما قلت الامن الصناعي والحقوق الصحية مهارات التفاوض انتم كتير اوي اتكلمتم النهاردة علي مهارات التفاوض، واضح انكم من الخبرة عندكم المهارات دي عالية قوي ممكن اخرين من زمايكم يكتسبوها ويستفيدوا من خبرتكم. انا مش عارفة لو ده يناسبكم ان يبقى فيه تدريبات متعمقة في الموضوعات اللي انتم طرحتموها النهاردة فممكن نشوف ازاى انتم مع زملاء ليكم نقدر نعمل النوع دا من التدريبات، فين وازاي والموضوعات اللي انتوا بتطرحوها فيا ريت تفيديوني عشان لو هنعمل حاجة زي دي نبقى مع بعض بنعملها. انا طرحت مجموعة من الموضوعات انتم تفنكروا في موضوعات اخري محتاجين فيها التدريب.

\* محمد العطار: اولاً انا باطلب حاجتين، الحاجة الاولى بيقى عملية دورة تثقيفية نتكلم في الحقوق للعمال والقانون والنقابات والحاجات دي التي تشمل العمل ككل. الحاجة الثانية طبعا مش كلعاملات هيجم انما ممكن تتعلم مطويات بتشرح في الموضوع بيتكلم مثلاً عن قانون العمل بيتكلم عن الحقوق الصحية بيقى مطوية توزع علي بعض العاملات اللي هما مش هيقدروا يجم بيقى هنا اللي مش هيقدروا يجم هياخد المطوية هيوقف نفسه زائد القيادات اللي هيقدروا يجم هيبتقفوا ويقدروا ينقلوا خبراتهم للعاملات داخل المصنع.

\* منيرة صبرى: هو في حاجة ان احنا ممكن لو فيه عدد ٢٠ مثلاً توفر في مكان ما وفي موضوع محدد احنا ممكن بنروح لغاية المكان وبنعمل التدريب. وجميلة طبعا فكرة المطوية لاننا مش هنقدر نغطي الجمهورية مش هنقدر نغطي الاماكن كلها. مهم جدا انتم حاسين بقضايا قوية جدا وطرحتم النهاردة قضايا قوية جدا ومهتمين ان فيه اخرين تستفيد.

\* شهدان الغريابوي محامية في مجال المرأة العاملة ورئيس مجلس ادارة جمعية "الخدمات القانونية للمرأة والطفل" الاسكندرية: بنشتغل علي النساء العاملات والاطفال العاملين في المنشية والحقيقة فكرة المطويات دي احنا عملناها فعلاً وهي موجودة عندنا وكان عندنا دعوة زمان ان احنا نعمل التدريب ده فعلاً للعاملات لاننا عملنا فيه ابحاث ميدانية وجدنا ان النساء اكثر حاجة بيحتاجولها التوعية بحقوقهن القانونية

او قدرتهن علي الاندماج في روابط عشان اختصر عندنا استعداد نشغل مع "المرأة الجديدة" ومع أي مؤسسة عايزة تعمل التدريب احنا عندنا خبرة كافية في المجال. قعدنا مع ستات كتير اوي وعارفين ايه اللي بيحتاجوله بالظبط، تم التنويه عن التحرش الجنسي اثناء العمل ومكملناش الكلام فيه عندي مادة كثيرة خالص وكنت عايزة اطرح للبحث والمشاركة في الفكرة دي ونشوف هنتعامل معاها ازاي، وازاي بنتناول المشكلة دي، من ضمن المشكلات كمان ما يتعلق بخصوص المرأة العاملة كائني يعني كل المشكلات اللي شوفناها في البحث دي تخص المرأة والرجل ولكن قليل قوي لما نتكلم عن صفة المرأة العاملة واجازتها كاجازات الوضع خصوصا العاملات المؤقتات، ما ينفعش الست تاخذ اجازة يوم بعد الوضع الا باذن طب هي ولدت ازاي تقدر تبلغ يا اما نتفصل.

المهم اننا نبدي استعدادنا للمشاركة في الدعوة دي وعندنا في الاسكندرية بس للاسف ويمكن الناس بتوع دمنهور يفضلوا عندنا وشكرا.

## ورش العمل بمحافظة السويس

المكان: جمعية تنمية المجتمع الشلوفة

التاريخ: ١٨ ابريل ٢٠٠٨

\* رجب الشحات رئيس مجلس إدارة جمعية تنمية المجتمع بالشلوفة بمحافظة السويس:  
السلام عليكم ورحمة الله وبركاته.. أهلا وسهلا بكم ومرحبا بضيوفنا الأغزاء.. احنا  
النهاردة استكمالاً لموضوعاتنا اللي احنا بقالنا بتاع شهرين بنشتغل فيها.... جات لنا  
يعني كده مشاركة عزيزة من جمعية "المرأة الجديدة" بالقاهرة... واحنا فعلاً بنرحب  
بهم النهاردة. وبنرحب بكل المشاركين معنا.. مش هنقول ضيوفنا.. لأنهم مشاركون  
معنا في التنمية.... الموضوع طبعاً اللي احنا هنتكلم فيه النهاردة هو موضوع حيوي  
ومهم جداً بالنسبة لأولادنا في القرية، الموضوعات اللي هي بتخص مشكلات المرأة  
العاملة في القرية فعلاً من المشكلات اللي احنا اتعرضنا لها بس مش علي جانب  
متعمق بس ان شاء الله احنا هنتكلم النهاردة مع اخوة متخصصين.. معنا احنا طبعاً  
دايماً في كل الندوات اللي احنا عملناها في الجمعية الأستاذ عبد السلام بنا وكيل وزارة  
القوي العاملة والهجرة بالسويس.. طبعاً ده هيبقي علامة معنا في الكلام اللي احنا  
هنتكلم فيه النهاردة وما يخص المرأة ومشاكلها خصوصاً في قطاع النسيج وفي القطاع  
الصناعي.. احنا مش هنطول عليكم لأن الكلام ان شاء الله هيبقي متع وان شاء الله  
يكون مثمر معنا واهلاً وسهلاً بكم ومرحبا والسلام عليكم ورحمة الله وبركاته.

\* هالة شكر الله مؤسسة "المرأة الجديدة": أحنأ طبعاً يعني سعداء جداً بان احنا نكون  
قاعدين معاكم النهاردة.. احنا في مؤسسة "المرأة الجديدة" بنشتغل علي قضايا كثيرة  
جداً من حوالى عشرين سنة... علي حقوق النساء بشكل عام في كل الفئات في مجتمعنا  
وده بهدف تنمية هذا المجتمع اللي هو عزيز علينا كلنا.. طبعاً يعني فئة مهمة جداً من  
الفئات دي هي فئة العاملات.. احنا ما بنتكلمش نيابة عن حد.. ولكن ازاي الأصوات  
دي هي اللي تبتدي ترتفع وتبقى بتشكل صورة مكتملة للوضع الاجتماعي والاقتصادي  
في مصر، وأيه التغييرات اللي مطلوبة عشان فعلاً نبقى مجتمع نامي ومجتمع الطاقات  
اللي فيه طاقات بتتفجر وبتبدع وبتتحرك.. احنا بقالنا تقريباً سنة بنعمل دراسة كانت  
عن ظروف العاملات خصوصاً في السنوات اللي فاتت اللي هي شهدت تغيرات  
كثيرة جداً في الصناعة المصرية من خصخصة الي بيع قطاع الأعمال إلي آخره  
يعني، لقوانين العمل جديدة كل الظروف دي أكيد بنفترض انها غيرت في شروط  
عمل النساء، احنا طبعاً طلعلنا بنتائج لكن هدف اللقاء ده مش ان احنا نيجي نعرض  
عليكم نتائج البحث، لكن هدف اللقاء الحقيقة ان احنا نسمع لكم انتم، ونسمع المشكلات  
ونسمع اقتراحاتكم وده مش عشان ندونه في بحث ونقدمه لحد ولكن الأساسي في  
الموضوع انه احنا نشكل مجموعات قريبة من بعض، وازاي تبتدي نستمد قوتنا من

بعض، وازاي يبتدي صوتكم يوصل، وازاي يبقي فيه مجموعات بتتضامن مع بعض حول مطالبكم ومطالب غيركم الي اخره.. احنا متواجدين في القاهرة ده صحيح لكن احنا مش حابين نبقي شيء معزول عن مشاكل الشعب ده بكل فئاته وانتم اكيد في موقعكم مش عايزين تبقىوا معزولين عن باقي فئات المجتمع المصري، فمهم قوي ان احنا نبتدي نشوف ازاي نبقي حاططين ايدينا علي المشاكل، ازاي نبتدي ناخذ دورا فعلا في ان احنا نعبّر عنها وان احنا نحلها مع بعض ومفيش حد ممكن يحل حاجة لواحد، وازاي ده يبقي بداية فعلا ترابط وتشابك ما بين الجمعيات وبعض وما بين الفئات المختلفة في المجتمع مع بعض، فزي ما بقول احنا حابين نسمع اكثر منك ونشوف بعد كده ايه دور الجمعيات المتواجدة في المحيط بتاعكم هنا وايه دور جمعية زي جمعيتنا وازاي نبتدي نشغل كلنا مع بعض علي اساس نتقدم للأمام.. انا هقف هنا وهدي الكلمة للدكتورة أمل.

\* د. أمل عبد الحميد منسقة وحدة رفع الوعي بمؤسسة "المرأة الجديدة": أنا مهتمة من فترة طويلة بموضوع كل المشاكل الخاصة بالمجتمع بوجه عام بالتحديد يعني شوية حاسة ان فيه مشاكل خاصة بالنساء سواء النساء العاملات او النساء اللي بيشتغلوا في قطاع غير رسمي اللي هو المالهوش علاقة قوي بقوانين العمل والقوانين اللي هي كل شوية بترجع لها وبنقول ان هي فيها مشاكل، ان هي ظالمة ان هما كل شوية يدونا حاجات وشوية ياخدوها منا، فلقينا ان الجزء اللي خاص بالقوانين والجزء اللي خاص بالمشاكل اللي داخل اماكن العمل، مشاكل ان لو احنا اتعرفنا عليها عن قرب تبقي اكثر يعني نقدر اكثر نلمسها ونقدر اكثر نحلها عن ما احنا بنعمل ابحاث او بنعمل دراسات او بنحل قوانين موجودة وينحطها في الآخر في شكل توصيات ويعدين بعد كده ممكن يطلع قانون بس ما نقدرش نفعله، ممكن تكون موجوده بالفعل قوانين ولوايح بس العاملات نفسها معندهومش فكرة عنها وعن ازاي ان هما يستخدموها او ازاي يفعلوها وبالتالي بيبقي فيه مشكلة في ان هما ازاي يوصلوا لحقهم. مشكلة كمان ان احنا ممكن يبقي عندنا فكرة عن ان يبقي فيه مشاكل بوجه عام لكن المشاكل الحقيقية اللي هما حاسبين بيها ممكن تكون مختلفة عن اللي احنا عاملين نتكلم عليه، وبالتالي لما ننزل ولما نشغل مع بعض ولما نتبادل خبرات بعض جوه الأماكن الحقيقية بتاعتنا اللي هي اماكن العمل متهياي ده هيخلينا عندنا اتساع اكثر لأفكار مختلفة عن الأفكار اللي احنا بنتناولها طول الوقت بشكل نظري بعيدا عن الشكل العملي اللي موجود، ومتهياي احنا النهاردة موجودين مش عشان خاطر بس نقعد النهاردة ونتعرف علي



اهم المشاكل وخلاص دى بداية لسلسلة قعدات مع بعض لقاءات مع بعض، من خلالها نقدر نعمل عملا مشتركا يكون فيه تبادل لينا وليكم في الخيرات نقدر نستفيد منها كلنا وشكراً.

\* منيره صبري مسئولة وحدة التدريب في مؤسسة "المرأة الجديدة": أنا طبعا سعيدة جدا بوجودي في وسطكم، اعتقد ممكن باستأنكم في أن احنا بعد ما يتم العرض، تتم مناقشة المشكلات بتاعتكم، ممكن احنا في "المرأة الجديدة" بنعمل حاجة ان احنا بنشوف ايه الاحتياجات التدريبية اللي عند الناس، منها ما يتعلق بالمهنة نفسها صحيا وشروط العمل والنقابة بتعمل ايه معنا ولا مش معنا، احنا اصلا في نقابة ولا مش في نقابة، الحاجات دي كلها مشاكل ممكن نناقشها مع بعض، ودي فرصة ان احنا قاعدين مع بعض بنتبادل الخبرات، وانا بقول ان احنا في "المرأة الجديدة" بنحاول نقوي قدرات بعض، انا خليني للأخر اقدم معاكم وهاشوف من خلال كلامكم ايه الاحتياجات اللي ممكن احنا نحاول عملها سوا مع بعض وهاطرحها عليكم ونناقشها. أشكركم.

\* هالة شكر الله: أنا عابزة نبتدي المناقشة... اتفضلي

\* (ت.م) عاملة فى إحدى شركات الغزل والنسيج بمحافظة السويس: باشتغل من حوالي ١٣ سنة، من مميزات الشركة انها بتجيب لنا اوتوبيسات بتاخذنا من الشركة لحد المكان اللي احنا ساكنين فيه، ويرده من مميزات الشركة انها بتعمل لنا حضانة، لو فيه واحدة معاها ابنها بتاخذ معاها تدخله الحضانة وهي خارجة من الوردية بتاخذ من الحضانة، فدي حاجة كويسة الشركة عملتها لينا .. بس.. احنا من حوالي السنة اللي فاتت او من كام شهر عملنا اعتصام فادونا ١٠ ٪ قال ١٠ ٪ دي الشركة عملت لها ضوابط اللي بياخد ٣ ايام مرضي واللي يعمل اجازة ما يخش حاجة... مش المفروض دي حاجة القانون ادهلنا والكل يصرفها.. يعني احنا امام الرأي العام ان احنا اخدنا ال ١٠٪ انما داخل الشركة احنا ما صرفناش ال ١٠٪ لان كلنا محتاجين لاجازات، كلنا بيحصل لنا ظروف، كلنا بناخد مرضي.

\* هالة شكر الله: اجمالي المرتب كام في الشهر ؟

\* (ت.م): ده انتاج مفيش مرتب ثابت.

\* هالة شكر الله: مفيش مرتب ثابت ؟ !!

\* (ت.م): لا.

\* هالة شكر الله: بالقطعة؟

\* (ت.م): أيوه. ده إنتاج.

\* هالة شكر الله: انتم كام ورديه؟

\* (ت.م): احنا ورديتين صبح وظهر.. والرجالة ٣ ورادي صبح وظهر وبالييل.

\* هالة شكر الله: بتاخدوا كام زيادة ١٠ ٪ ولا كام؟

\* (ت.م): كانت التسعيرة بتاعة الخيط بتت حسب بالمليم، فاحنا طالبنا ان احنا يرفعولنا التسعيرة بتاعة الخيط.. احنا طالبنا ان عامل الإنتاج لازم يكون له حافز.. هما بيقولونا لأ الخدمات والاحتياطي والتقليع بس اللي بياخدوا حافز لكن عامل الإنتاج ملهوش حافز.. الرجالة عملت اعتصام ٣ ايام يخشوا الوردية يشتغلوا ويعدين يخرجوا يفضلوا قاعدين في الجنيئة واحنا طبعاً معاهم فى وردية الصبح والظهر لكن اكثر من كده ما نقدرش نقعد معاهم.. فجت الوزيرة وجم ناس من مصر بس احنا منعرفش.. فقالولنا انتوا هيتصرف لكم ١٠٪ بعد كده الشركة قالت لنا لا تعالوا لسه فيه ضوابط اللي ياخذ مرضي، اللي ياخذ اجازات، اللي عنده غياب، اللي عنده معرفش ايه مايصرفلهوش ال ١٠ ٪ ويكده احنا ماخذناش ال ١٠٪ والوزيرة لسه من كام يوم.. سمعنا ان هي عملت ١٥ يوماً لشركة الغزل والنسيج او لشركات الغزل والنسيج ومعرفش فيه شركة تاني اخدت شهر.. المحلة الكبرى باين.. قالت دول لهم شهر علشان كان فيه اعتصام او فيه حاجة زي كده.. فاحنا قالولنا انتوا لكم ١٥ يوم.. بعد كده فوجئنا ان ال ١٥ يوماً للقطاع العام بس.. القطاع الخاص لأ.. طاب مش هي الوزيرة اتكلمت وقالت لكل شركات الغزل والنسيج.. يعني المفروض كلنا يكون لنا ال ١٥ يوماً الزيادة لان الاسعار عليت وكل حاجة زائدة والراتب اللي احنا بناخده ما بيساويش الحاجات الي احنا نشترىها والحاجات الي احنا عايزينها.. فبرده ال ١٥ يوماً ما خدناهمش.. او

لسه فيه القرار لما يجي من مصر لما نشوف هيقولونا ايه.. مش عارفه ايه.. لحد دلوقتي ماتعرفش ايه مصير ال ١٥ يوما الي السيدة الوزيرة اتكلمت عنهم.. لأ.. لحد دلوقتي بيقولونا احنا هنشوف في مصر لما يجيبولنا قرار ان احنا نصرف للعمال او لأ ومخدناهمش برده.

\* هالة شكر الله: فيه لجنة بتفاوض باسمكم ولا لأ ؟

\* (ت.م): اعضاء النقابة هما اللي يسافروا مصر ويجيبوا لنا صورة من القرار او يشوفوا القرار هيعمل ايه.

\* هالة شكر الله: لأ يعني فيه لجنة نقابية عندكم في المصنع؟

\* (ت.م): أم.. فيه في الشركة نقابة.

\* هالة شكر الله: اللجنة النقابية دي بتفاوض باسمكم؟

\* (ت.م): قالولنا احنا روحنا علشان نشوف نجيب القرار.. قالولنا للقطاع العام فقط لكن للقطاع الخاص لأ.. فقولناهم ازاى مش احنا تبع الغزل والنسيج زيهم.. فقالوا احنا هنشوف كده ربنا يسهل احنا هنعمل ايه في الموضوع ده. وشكرا.

\* هالة شكر الله: طاب فيه مشاكل تانية اللي انتم بتواجهوها في مكان العمل؟

\* (ت.م): أولا شركات الغزل والنسيج بيتحسب أو يجيبولها وجبة.. بيصرفولها لبن علشان الهيو والغار اللي بيبقي موجود في المصانع.. احنا معندناش لا كماسة ولا سداة للأذن ولا أي حاجة للمكان اللي بنكون موجودين فيه كله غفار وكله هيو.. برضه مقيش الحاجات دي عندنا في المصنع.

\* (ز.م) عاملة فى أحد مصانع الملابس بمحافظة السويس: بنقابل برضه مشاكل كتيرة قوي..أولا المرتب قليل جدا.. ثاني حاجة السهر علي طول يعني المفروض ان احنا مثلا بنروح الساعة ٧ صباحا بنطلع مثلا ٣ ونص عصرا لأ ممكن تفضلي سهرانة

الي ٥ ونص ٧ ونص الي ١٠ ونص مساء دي مشكلة برده بتقابلنا.. ثاني حاجة سوء المعاملة.. المعاملة وحشة جدا.. طبعا احنا عارفين النظام خاص طبعا، غير النظام الحكومي.. ثاني مشكلة مش مهتمين بالصحة خالص.. يعني علي الأقل المفروض يكون فيه كشف طبي.. مفيش اي حاجة من الحاجات دي خالص.. واهم حاجة عندنا بتهدنا هي سوء المعاملة.. دي من المشاكل اللي بتقابلنا كثير قوي.

\* هالة شكر الله: ازاى لو تقدرى تشرحى لنا بالظبط؟

\* (ز.م): يعني اقل حاجة واحدة اتكلمت وحاولت انها بس تقرض رأيها او تاخذ حقها يقولوا لها... اطلعي بره.. علي طول.. انت متتكلميش اصلا.. فعلي طول اطلعي بره.. انت مالكيش انك انت تتكلمي.. مفيش حد بيتكلم باسمنا اصلا.. احنا مش شايفين اي حاجة الصراحة.. مفيش لجنة نقابية.. مفيش اي حاجة من الحاجات دي.

\* هالة شكر الله: مفيش عقود عندكم؟

\* (ز.م): هو العقد بيقتد عموما حوالي ٥ سنين.. بس في أي وقت طبعا هو عايز يمشيكي هيمشيكي اوتوماتيك.. هو مش عايزك هتمشي.. هيمضيكي ساعتها الإستقالة وهتطلعي بره علي طول.. هو مش عايزك خلاص.. يعني دي برضه المشاكل اللي هي بتواجهنا.

\* هالة شكر الله: عايزة أسالك بس هو العقد لما بتعملوه بتبقوا ماضيين معاه استمارة ٦ ولا العقد بيبقي موجود بالسنة من غير استمارة ٦ ؟

\* (ز.م): انت قبل ما بتشتغلي بتمضي استمارة ٦ فيالتالي لما مبيكونش فيه استمارة ٦ فمن حقا تروحي مكتب العمل وانك انت تشكي وتعملي اللي انت عايزاه.. لكن هما بيمضوكي الاستمارة قبل العقد.. فاوتوماتيك يطلعوكي بره.

\* هالة شكر الله: بالنسبة لعدد الساعات الإضافية اللي انتوا بتشتغلوها اللي هي "الوقت الإضافي" ده انتوا بتأخذوا فلوس عليها ولا ما بتأخدوش وبتتسبب من ضمن الاجر اليومي؟

\* (ز.م): هي عموما ساعات بتتسب وساعات مدير الإنتاج ما يحسبهاش ويقول انتي مطلعتيش الإنتاج بتاعك، اللي هو المفروض يطلع ومالكيش أي أجر عليها.

\* هالة شكر الله: يعني انت بتتعلمي بالإنتاج مش بعدد الساعات؟ أيا كانت عدد الساعات إيه المهم الإنتاج اللي انت طلعتيه في الفترة دي.

\* (ز.م): ايوه، ثاني حاجة يا دكتورة فيه حاجة تانية عايزه اتكلم فيها.. اللي هي مثلا الوجبة.. الوجبة دي تخيلي احنا المفروض ١٠٠ جنيه.. احنا بنأخدها كام.. ٢٥ جنيهها.. ولو غيبتي مثلا ٣ ايام مالكيش حاجه اسمها وجبة.. وبنأخدها ٢٥ جنيهها.. ٣ ايام غيبتي.. طبعا انت بتتعرضي لظروف كتيرة ممكن مرضية، ممكن طبعا اي حاجة خارجة عنك فيتضطري انك انت بتغيبتي.. كمان حاجة تانية اجازات.. لازم تكوني مبلغة عليها طاب افرض حصلت عندك اي حاجة ظرف طارئ لقدر الله او اي حاجة مالكيش اجازة.. انت ماقولتيش قبلها مالكيش اجازة.. ثاني حاجة فيه حاجة اسمها بدل انتظام يعني بنشوقها في الإسماعيلية.. بدل انتظام ١٠٠ جنيه.. مفيش حاجة هنا اسمها بدل انتظام.. يعني مفيش اي حاجة الصراحة.

\* هالة شكر الله: ماذا عن الحوافز ولا مفيش حوافز؟

\* (ز.م): الحوافز دي كل شهر مرة ما نأخدها.. وإيه ٥ جنيه مثلا.. إيه ٥ جنيه دي هتعمل إيه؟!

\* هالة شكر الله: ٥ جنيه في اليوم ولا ٥ جنيه في الشهر؟

\* (ز.م): ٥ جنيه في الشهر.. هو فين الحافز اللي بيديهوك ٥ جنيه... مفيش اي وسائل تشجيع او اي حاجة خالص.

\* هالة شكر الله: متوسط الاجر أد إيه؟

\* (ز.م): اللي هو المرتب عموما يعني انت بتمضي علي ٢٠٠ جنيه او ٢٢٥ جنيه العقد.. مثلا بعد سنة توصلي ٢٧٥ جنيهها.. ٢٧٥ جنيهها هيجيبوا إيه يا دكتورة دلوقتي..

احنا شايفين الظروف اللي احنا عايشين فيها.

\* هالة شكرالله: اتفضللي.

\* (س.م) عاملة باحدى شركات الدواجن بالاسماعيلية: احنا كل شغلنا طبعاً طول اليوم في العنبر.. لان طبعاً بنحصن كل الفراخ، احنا المسؤولين عن التخصيمات قسم الرعاية البيطرية، معانا دكتورة بيطرية طبعاً مشرفة علينا وكده، احنا معاه، فطبيعة العمل بنشغلنا طول اليوم شغالين جوه العنبر، طبعاً الريش بتاع الفراخ الرفيع والغبار البسيط ده بيدخل جوه النفس ويعمل لنا مشكلة دي حاجة.. هما جابوا لنا كمادات وكده بس أنا بصراحة ماعدتش بالبسها ما بعرفش انتفس جواها كده بحس ان نفسي بينكتم جواها، تالت مشكلة برده الأجر صغير يعني أنا مثلاً لسه حديثة التعيين أنا بقالى ٥ سنين، ماشيه في ال ٥ سنين بس يقبض ٣٢٠ جنيهاً يعني والحوافز كانت موجودة وانقطعت خالص يعني، طبعاً كانوا بيدولنا في مولد النبي كنا بنأخذ علبة الحلويات وفي رمضان كنا بنأخذ شئطه فيها كل مستلزمات رمضان والحاجات دي انقطعت كلها برده مكانتش بتيجي كنا متعودين عليها، انقطعت تقريباً من بعد ما اتعينت، تقريباً أنا اتعينت من ٥ سنين، اخدتها مرة واحدة بعد ما اتعينت علي طول

\* هالة شكرالله: متوسط الأجر برضه كام؟

\* \* حضرتك أقل حاجة ٣٥٠ جنيه دلوقتى اه.

\* ٣٥٠.

\* (س.م): اه.. بس حضرتك.. مش هتسهر النهارده خلاص.. يعني مفيش فلوس.. ويخصم يومين من القبض، واليومين طبعاً مثلاً ممكن يخصم ٤٠ جنيهاً او ٥٠ جنيهاً عقبال ما الواحد يجي يقبض مايلاقيش حاجة.

\* (م.ش) رئيس إحدى الجمعيات بمحافظة الإسماعيلية: بالنسبة للبنات اللي شغالة فى شركة الدواجن فيه ناس فى الإدارات قاعده فى مبني الإدارة فى التكليف وميه ميه ويتأخذ لها الف جنيه وواحدة طاقحة الدم فى العنبر ويتأخذ ٣٠٠ جنيه، يعني تفاوت

فى المرتبات بالنسبة للبنات اللى موجودين معايا اهم ٣ فى قسم واحد بينظفوا ماسكة  
لامواخذة المقشة طول النهار فى الشمس، حاجة تانيه سوء المعاملة برده، زى الاخت  
اللى قالت فيه سوء معاملة، ازاي يعنى مثلا الرئيسة عليهم واحدة متقربة لها اه دي  
حببتها، تقعد طوال النهار معاها فى العنبر، مياه ساقعة وكولمان وبتاع والتانيين  
طاقحين الدم.

\* (م.م) أنا شغالة فى إحدى شركات الملابس الجاهزة.. بنروح يوم الجمعة بيقلونا  
تعالوا فيه اضافي وكده بس مش بيدونا الإضافي، وساعات بنسهر وكده بس السهر  
ببلاش من غير اضافي ولحد الساعة ٨ هو المفروض نمشي الساعة ٤ بس، ويوم  
الجمعة اللى هو بنستريح فيه بييجيونا فيه ويقلونا تعالوا وهنديكوا حقكوا وانتوا  
ماشيين ومش بيدونا قلوب، والاتوبيسات ملهاش مواعيد معينة، المواعيد بتاعتها من  
الساعة ٧ ونص، مبتجبلناش فى معادها.

\* (م.ا) عامل فى شركة ريبييل بالمنطقة الحرة طبعاً هو موجود عيوب كثير يعنى  
فى الشركة ان احنا مش حاصلين علي حقوقنا فى اي وقت ممكن يقولوا بره اخراج  
معاندش تيجي تاني، السهر اجباري يعنى بعض الشركات السهر لهم اضافي وحاصلين  
علي حقوقهم، عندها لا السهر اجباري، طلعت انتاجية أو مطلعش برده سهران، ولو  
رفضت السهر متجيش الشركة تاني

\* هالة شكر الله: طاب ممكن نتنقل إلى السويس

\* (ن.ش) بشتغل فى إحدى شركات الملابس الجاهزة بقالي سنتين، اول ما دخلت اول  
شهرين كان كل يوم بروح الساعة ٤ العصر وبينزلي مرتب كويس ٧٠٠ جنيه اول  
كل شهر ومكناش فيه سهر ولا حاجة خالص، جيت بعد كده قالوا ده فيه سهر ولازم  
تطلعي معدلك من الانتاجية، بيحطوا معدلات خيالية محدش يقدر يطلعها، ممكن اقدر  
من الساعة ٨ الصبح للساعة ٨ بالليل والمعدل ما يطلعش، ما هو طبعي انت بتحتلي  
المعدل ده عشان انت عارف ان انا مش هطلع، قعدت كملت بعد كده ومرتبتي برضه  
قاعد زي ما هو، وفيه ناس بينزلوا مرتباتها وبيرفعوا المرتبات بمزاجهم، ولا فيه  
قانون ولا فيه اي حاجة، حتي قالوا ان الحكومة نزلت ١٠ ٪ اللى، احنا مانزلتناش  
اي زيادة، وممكن اقدر من الساعة ٤ لغاية الساعة ٨ او الساعة ٩ وانا قاعدة شغالة

كل ده من غير "اوفر تايم" واروح الجمعة كل ده من غير اوفر تايم ولو ماروحتش الجمعة يتخصم من مرتبي ١٢٠ جنيها، يعني بدل ما بقبض ٧٠٠ اقبض ٥٠٠ او ٥٨٠ جنيها، ما هو انا لو غييت يوم بتتخصم ال ١٠٠ جنيها اللي هي بدل الانتظام وتمن اليوم بيومين يعني بيتشال ١٤٠ جنيها تمن اليوم الواحد، ولو جيت الساعة ٤ روح، المفروض اني اروح الساعة ٤، لو جيت مشيت الساعة ٤ يروح عاملي ٢٠ جنيها جزاء أو ٥٠ جنيها جزاء يعمل الغاء يوم، انا روح جدي ماكنتش اعرف الحاجات دي بقي، اللي بيروح جديد بيقدد تقريبا حوالي شهر، شهر ونص وبيتعامل معاملة خاصة، الحاجات دي ما بتظهرلوش في الاول عشان يقعد ويكمل، بعد ما بيقبض بقي مرتب كويس يشوف الحاجات دي يقول لأ طاب أنا لو روح شركة تانية مش هاقبض المرتب ده فيبضطر انه يكمل، انا جيت من حوالي ٣ شهور كده من شهرين مشيت لقيت شركة تاني يعني افضل من الشركة دي، مشيت وروح الشركة الثانية، قلالي لأ انت ما تمشيش من عندي، وراح الشركة الثانية جابني من هناك، عملي شكوي في الاستثمار، قال لي انت يا أما تشتغلي في الشركة ياما ما تدخلش الاستثمار خالص، رجعت تاني قعدت شهر، قعدوا يعاملوني اني انا اكمل وكده، ويقولوا لي انتي كل يوم هتروحي الساعة ٤، طبعا احنا كنا قاعدين مجموعات مع بعض، المجموعة اللي بتروح بتروح كلها مع بعضها، قالوا لأ أنت لوحك تروحي الساعة ٤ او الساعة ٤ ونص في الاتوبيس بتاع الساعة ٤، طاب يعني ايه يعني احنا قاعدين ٥ مع بعض يعني انا ماقدرش ان انا اروح وهما قاعدين يشيلوا الشغل بتاعي، ما ينفعش، انا مارضيتهاش، يعني نزلوا لي مرتبي ٧٠٠ جنيها وقالوا لي هنزلك كمان ١٠٠ جنيها زيادة تبقي ٨٠٠ جنيها ومكافآت كل يوم والثاني مثلا ٢٠ جنيها، ٥٠ جنيها مكافأة، بس انا علي السهر، انا مش علي الفلوس دي كلها، انا عايزة ال ٧٠٠ جنيها بس، مش عايزة كل ده في مقابل ان انا امشي الساعة ٤، ٥، ٦.

\* هالة شكر الله: انت يوميا بتقدي للساعة ١٠ بالليل؟

\*\* انا فيه يوم وصلت بيتنا الساعة ٣ ونص صباحا بالاتوبيس، ما هو انا ليا اتوبيس، الاتوبيس وصل كل واحد لغاية بيته، الاتوبيس طلع من هناك الساعة واحدة وخمسة، علي ما لف، فيه ناس معنا من فايد والفنارة، علي ما ودي كل واحد بيته انا اخر واحدة طبعا في الخط، وصلت الساعة ٣ ونص، انا باصحي تاني يوم الساعة ٥ عشان الاتوبيس بيطلع الساعة ٦، طاب انا وصلت الساعة ٣ ونص، هاصحي تاني يوم



ازاي الساعة ٥، غيبت ثاني يوم، عندنا غياب يوم بيوقف مرتبك اسبوع، يعني الشركة كلها تقبض مثلاً يوم ٧، انا اقبض يوم ١٤، انا اليوم اللي انا غيبتة ده وقف لي مرتبي، طاب انا اعمل ايه، كنت هاجي ازاي وانا مروحة الساعة ٣ ونص.

\* هالة شكر الله: يعني انت باختصار ال ٧٠٠ جنيه اللي هي معدل اعلى شويه من المرتبات الثانية قدامها ساعات العمل مفتوحة تماماً.

\*\* \* مفتوحة تماماً، مرة قعدنا للساعة واحدة وخمسة جوه الشركة يعني دي ٣ وريبات مش وريبتين في بعض.

\* هالة شكر الله: عددكم أد ايه في المصنع؟

\*\* \* المصنع فيه حوالي ٥٠٠ او ٧٠٠ مش كثير.

\* هالة شكر الله: نساء؟

\*\* \* نساء حوالي ٤٠٠ مثلاً

\* هالة شكر الله: فيه لجان نقابية ولا معندكوش لجان نقابية؟

\*\* \* فيه لجان نقابية

\* هالة شكر الله: اللجنة النقابية بتملكوا؟

\*\* \* فيه، بس مجرد اني انا رايحة اشتكي، محدش بييجي معايا خالص.

\* هالة شكر الله: يعني ما هي مش بتملكوا؟

\*\* \* لا هي مش بتمثلنا خالص.

\* (١.م) من إحدى شركة الصناعات النسيجية بالسويس، الشركة دي لها مشاكل كثير مع الناس، وتعبانا في حاجات كثير قوي قوي، يعني الحاجات اللي انا هاقولها عايزة حد يكمل معايا من كتر المشاكل اللي فيها، يعني الشركة دي اول ما دخلنا فيها، مكناش طبعاً داخلين علي اساس ان احنا بندي شغل ونأخذ مقابل اجر، حسيت بعد كده عايزنا نشغل زي الصخرة، الموضوع بيتحول للصخرة بعد كده، مرتب في البداية ١٦٥ جنيهها او ١٦٠ جنيهها، بعد كده استئنا ان المرتب يبق في الزيادة، السنين بقت بتجري علينا، والمرتب بيمشي زي مشي السلحفاة، وغير كده كمان المفروض مستنيين علاوات، علي اساس ان دي شركة استثمارية، اللي احنا بنسمعه علي ان الشركات الاستثمارية بتدي يعني مرتبات عالية عن الحكومية والحاجات دي، فاحنا اللي شوفناه في الواقع غير اللي كنا بنسمعه، دخلنا بقي مستنيين العلاوات والارباح والحوافز والحاجات دي، لقيناها مفيش، لقينا المرتب بتاعنا الي هو ١٦٠ جنيهها زاد بعد فترة كبيرة، بعد كمان ما اتكلما وعملنا اضراب، بقت كل حاجة عايزين نعملها في الشركة بقت لازم يبق في اضراب ولازم فيه اعتصام ولازم نتكلم ويبقي فيها شكاوي، والاتوبيسات عايز مرة واحدة يوقفها ويخلي الناس تيجي في مواصلات، طاب المرتب ضعيف، هتدي فلوس مثلاً للناس، لأ مفيش، بقينا نعمل مظاهرة، وقبل كده وصلت للوزيرة علي حكاية المطالب اللي هي جمعناها من كتر المشاكل، وصلنا للوزيرة في الاضراب اللي هو وصلت فيه الوزيرة هنا، وخلت فيه مفاوضات لمدة ٣ سنين، مشاكل بقي كثير بسبب القبض اللي مش راضي يزيد، ولا حكاية العلاوات والحوافز ولا الأرباح الي احنا بنشوفها، فخلاص يعني الناس لقت ان السنين بتمر عليها، والظروف كل مادا في الطالع، ارتفاع المعيشة، وكل شويه يتهرّب ويقول لك الشركة مش عارفه ايه، فاحنا جوه الشركة وشايفينها شغالة، فاحنا مش عارفين ايه مبرراته لحاجة زي كده، ولو نزلت لنا اي علاوة بيخليها للحد الأدنى، يعني مثلاً ينزلوها الحد الأدنى مثلاً ٣٠ جنيه ممكن يخلوها الأدنى بتاعته هو ١٠ جنيهات، طاب مش لاقين حد يحاسبه علي حاجة زي كده، يعني انا بتكلم المشاكل كثير العامة. وبعد كده هتكلم بصفة شخصية، والاتوبيسات برده بنواجه فيها مشكلة كبيرة، البنات بتبقي شوية شوية هتقع من الشبايبك بتاعة الأتوبيس من كتر الزحمة يعني، وغير كده كمان الاتوبيس ما ينفعش لاي بني ادم، حاطين الشكمان الي هو بيطلع العادم برة ده عندنا احنا جوه الاتوبيس، الدخان بننزل بنكح من ريحة الدخان، وهدومنا دي زي ما نكون بنحرق حاجة جوة الاتوبيس، بنبقي كل واحدة فاتحه ومطلعة دماغها برة بسبب الاتوبيس، مش عارفة ازاى يعني ساكتين علي حاجة

زي كده، غير كده مفيش حضانة للي هما متزوجات ومعاهم اطفال، ومفيش كمان  
طبيبة نساء وولادة، وغير كده كمان الشركة قعدت فترة مفيش طبيب ومفيش سيارة  
اسعاف، وغير كده برده الناحية الطبية يعني مهمة جامد، وغير كده برضه ناس  
كثير توفت فيها، يعني مخدوش حق ولا باطل معاهم، يعني هنا الحريق اللي حصل  
في الغلايات ده، اه ماتوا فيه مخدوش حاجة، مفيش تعويضات، وايه احنا اللي بقينا نلم  
من بعضنا، بقينا نلم لأهل المتوفي، يعني منهم كان واحد زميلنا ده مات في غسالة،  
بسبب الإهمال قال انها عطلانة محدش سال، فجھ في مرة قالوا له شغلها شغلها، فهو  
بيشغلها راحت قفلت عليه الغسالة الاتوماتيك، قفلت علي نصه من وراء، طبعا حديد  
من جوه راح طلع، مفيش معالم للججمة خالص، نقلوه في ايه، نقلوه في الاتوبيس  
بتاع العمال، يعني مفيش سيارة مخصصة لكده، مفيش اسعاف واللي ماتت بالزغطة  
وهي بتشرا مفيش ككتور نزل يسعفها، قال الدكتور هاتوهلنا فوق، مفيش راحة، مفيش  
بدل وردية، المشرفة كتر خيرها مضغوطة باللي اعلي منها، فكل واحد خايف علي  
اكل عيشه، احنا بسبب ضغط الشغل مش عارفين ندور علي حقوقنا، خايفين ان احنا  
ندور علي حقنا نلاقى القبض ناقص، ، يعني اللي بيتعب كمان بيخاف من الاجازة  
بالخصم ببيضطر انه يجي وهو تعب، انا كنت عاملة عملية في ظهري جيت اخدت  
فيها ٦ شهور، اخدت فيها اجازة شهرين، وبعد كده لقيت انا باصرف علي ابني،  
لاني مطلقة قاعدة برضه عند اهلي وبرضه ظروفهم علي قدهم، لما لقيت الشهرين  
دول وانا معايا ابن دلوقتي في المدرسة في رابعة ابتدائي لقيت ان قعدت في البيت  
الشهرين دول من غير اي مرتب، ما ساعدنيش غير صندوق الزمالة بس اللي احنا  
بندفع منه يعني من فلوسنا، هو اللي نفع شوية، طاب والغيارات والحاجات دي، طاب  
دي بتحتاج مصاريف، فاضطريت ان انا اروح الشركة واشتغل، قلت لا اشتغل ان  
شاء الله اموت فيها، انا بس الاقي اجري، وروحت فعلا اشتغلت حتي الدكتور كان  
في الشركة بيقولي انت المفروض تقدمي علي اجازة، قلت له طاب اقدم علي اجازة  
وماخدش اجر، طاب وانا اقد واصرف منين؟، فاستنيت بقي في الشركة واستحملت  
حتي الجرح كان مفتوح ما كانش حتي خياطة، فاضطريت اني انا استحمل وكنت  
تعبانة، واعمل ايه الجرح مفتوحا وقعد ٦ شهور، وغير كده كمان المرتبات لنا احنا  
الستات بصفة شخصية مرتبات ضعيفة، الراجل بيبقي اعلي منها، مش عالي عالي  
يعني بالنسبة للمرتبات، يعني مثلا احنا ساعة ما دخلنا الشغل كان المرتب علي ١٦٠،  
الشاب دخل علي ١٩٠، طاب احنا دلوقتي بقي نسبة كبيرة جدا مننا بقت تعول، معايا  
زميلاتي ارامل وغير كده المنفصلين كثير والارامل كثير، واللي بتساعد جوزها

كمان، بس المرتب ضعيف جدا، علي فكرة مشوني قبل كده انهاء تعاقد ورجعوني قبل كده هي مشهورة بكده الشركة دي، بقوا يعملوا انهاء تعاقد واجازة مفتوحة، مسميات كثير بيفصلوا بها الناس، كنت شغالة من ١٩٩٩ قعدوني في البيت ورجعوني ثاني علي نفس الورق القديم والكشف والفيش والتشبيه القديم، بس المرتب بقي جديد علي اساس اني انا راجعة جديدة، رجعوني برضه بال ١٦٠ ثاني، واللي هما ال ٢٨ جنيها اللي هما يا دوك طلعلولي بالعافية راحوا مني وقالوا ده خلاص انشالوا ومش هينزلوا ثاني، رجعت بقي في شهر يناير ٢٠٠٢، فوجئت برضه العقد ماضيينه بشهر يونيو ٢٠٠٢ برضه ال ٦ شهور الأولانيين مش متأمن بيهم، علي فكرة الزيادات دي حتي اللي بتبقي نازلة من الحكومة وبتبقي بتتكلم عنها برضه وبيبقي فيها اضراب عشان ناخذها احنا ولأنتنا مش عارفين قانون العمل ممكن يقف في صفنا في ايه لما نقع في مشكلة، المفروض يكون فيه توعية للعامل يعرف حقوقه فين، يعرف ايه النقطة اللي اتكلم فيها ايه النقاط اللي ما يتكلمش فيها، فده اللي مخلينا تايهيين، بيروحوا مكتب العمل يعرض علي الشركة وبيجيبوا الرد، والرد بقي ايه طبعاً الشركة مستغفيه، ما ييقاش امامنا غير القضاء، يعني بتوصل للمحكمة نتحمل مصاريف المحامين، وساعات فيه ناس كثير بتضطر انها تسببها، بتقول انا هقع في دوامة المحامين وناس بتتفصل بتبقي قاعده في البيت، وناس تعبت ومفيش قدامها اكل عيش ثاني فيتضطر انها تسببها بسبب المشاكل دي، زميلنا برده، ميت وهو مكاتش لسه اتأمن عليه، دلوقتي بقي ايه اصبح الناس القديمة اللي هي خلاص بقّت سنها كبير ومثلاً ما تقدرش تشتغل في حته ثانيه، ما يقدرش يمشيها، فهما دول اصبحوا اللي قاعدين كانوا ٣٠٠٠ حضرتك دلوقتي اصبحوا ١٢٠٠ اه دول متأمن علينا، دلوقتي بسبب خوفه من أن الناس تطالب بحقوقها بقي يدخل ناس باليومية دلوقتي، خايف يدخل ناس ثاني يثبتهم ويعملوا له مشاكل، بقي يدخل ناس باليومية، ما ييقاش لهم تامينات ولو حد راح دلوقتي هيلقي الناس دي باليومية، عشان كمان ما ييقاش يتكلموا ويبقوا لهم حقوق، عايز يخلص مننا احنا، انا معايا تقارير طبية من قومسيون طبي يمرطوني من قسم للتاني عشان يمشنوني، فانا صحيا دلوقتي يعني بقيت تعبانه وبقيت كذا مشكله صحية، عملت التقارير الطبية علي اساس اني انا ارتاح، لا ذا كاني فتحت باب الحرب عليه، عملت التقارير الطبية وايدتيهاهم، وفي التقارير الطبية القومسيون الطبي حدد اني اقوم باعمال كتابية، يعني اقل حاجة يكون بالاقسام بعيد عن اللي انا تعبانه منه، وايدت لهم ده ركنوه طبعاً في الدرج، وقالوا طيب لما يفضي مكان، بقالي دلوقتي كام سنة انا عامله من ٢٠٠١ لغاية دلوقتي ما ارتحتش، عشان امشي بقوا يودوني من قسم

للتاني علشان ازهق وامشي لغاية ما عرضوا عليا، شهرين علي السنة، ناس تعبت خلاص هيطالبوا بايه ولا ايه وهو ما قيش ولا حل، الناس ما بيقتش عارفه هنتكلم علي ايه ولا ايه، المرتب اللي هو بقي ضعيف جدا بسبب المعيشة، ولا المعاملة السيئة، ولا لما يروح الإدارة يلاقى كمان الجزاء بيتعمل له عشان بيطالب بحقه في الإدارة والمسئول عمال يحدفه من ده لده، بقت كلها دائرة مرتبطة ببعض والعامل هو اللي يطلعوه غلطان فيها، فالحنا في الشغل بقينا نخاف علي اليوم، بسبب الظروف هنعمل ايه، بنقول اللي هيجي منهم أحسن منهم.

\* هالة شكرالله: من كتر المشاكل مابقيناش عارفين نطالب بايه، يعني المشاكل كثيرة جدا لدرجة ان مابقيناش عارفين نبتدي منين ولا منين.

\* سعودي عمر، المنتدي المدني الديمقراطي: في واقع الأمر مش ممكن أبدا نتكلم عن مشكلات المرأة العاملة دون أن نتحدث عن مشكلات الطبقة العاملة، كثير من المشاكل والأضرار اللي بتعرض لها الطبقة العاملة المصرية منها المرأة العاملة المصرية هي صناعة حكومية في الأساس، فالتمييز بيتم حتي علي مستوي التشريع، يعني المرأة العاملة المشتغلة وفقا لقانون ٤٧ الخاص بالعاملين المدنيين بالدولة وبين العاملة الخاضعة لقانون ١٢ سنة ٢٠٠٣ هنكتشف ان هناك اختلافا في القانونين في المواد المتعلقة بعدد مرات الحق في اجازة الحمل، وظروف تشغيل النساء، عايز أقول لحضراتكم ان مشكلة الزميلة في السويس هي نفسها مشكلة زميلتنا في شركة الإسمايلية، انا شاهد عيان علي مدي سنة كنت بأسافر يوميا من السويس للإسمايلية في ظروف طقس مختلفة القي عشرات من البنات واقفات في نص الصحراء، الملاحظة المهمة قوي ان كثير منهم لم يتجاوزوا الـ ٣٥ سنة، كلهم في متوسطات عمرية صغيرة، واقفين في البرد الشديد جدا، وبدون مظله واقفين في الهواء، ومستتئين لما يجيلهم الأتوبيس، عايز أقول في ايجاز في السويس فيه اربع مواقع رئيسية بتعمل فيهم النساء: شركة مصر ايران، شركة تراسن النسيجية، شركة بلازا، وشركة السعدي، بالإضافة مثلا للمشتغلات في المحال التجارية، وانا اعتقد ان برده المشتغلات في المحال التجارية بيتعرضوا لكثير من المشاكل واللي باعتقد ان اثار اليها عرضا الفيلم بتاع عمارة يعقوبيان، انا رايت انه فيه انتهاكات وانتهاكات غير عادية تقع علي هؤلاء النساء، انا بس عايز أقول اذا احنا مشغولين بقضايا النساء باعتبارنا ناشطين في المجتمع المدني، مهم قوي واحنا بنتكلم عن مشكلات النساء

واحنا بنستعرض حتي التشريعات مهم قوي كمان نستحضر الحالات الإجتماعية،  
الحالة الإجتماعية للمرأة العاملة المصرية

\* (أ.م): صاحب العمل على طول بيقول مالكومش حاجة عندي، طبعا بنروح مكتب  
العمل نشتكى، مش عارفه مكتب العمل تبعه ولا ايه بالضبط ما بيعملناش حاجه،  
وعشان طبعا سوء المعاملة، الشركة عددها قل قوي، فدلوقتي بيشغلنا بعد الساعة ٤  
تشطيب، يعني ده مجال ثاني حاجه تانيه خالص، طبعا فيه ناس كتير قوي بتزهق  
وبتمشي وبتسبب طبعا مرتباتها، بالنسبة للوجبة مفيش ولا وجبة ولا بدل وجبة، الفاظ  
مهينة جدا بتنقل، بيقل البوابات كلها بتاعة الشركة، حاجات كتير قوي

\* هالة شكر الله: بيقل البوابات عليكو عشان متقدروش تطلعوا..

\* (أ.م): آه.. علشان محدش يخرج، حتي بوابة الأمن بتنقل.

\* هالة شكر الله: هل فيه شرط جزائي لو سببتي الشركة؟

\* \* فيه ٥٠٠٠ جنيه شرط جزائي.

\* هالة شكر الله: وانتوا عاملين عقود باد ايه؟

\* (أ.م): ثلاث سنين، وبيجدد، هو مفيش حد بيكمل ال ٣ سنين، انا جيت من ٤ شهور،  
يوم ٢٩ قعدت من ٨ الي ٨ علي المكنة ومطلعة معدلي وفوق معدلي، فجيت علي  
الساعة ٨ خلاص انا تعبت عايزة امشي، فالمهم مرضيش يمشي، المشرف بتاعي،  
طبعا مع صاحب المصنع، عملي انهاء بدون مستحقات، طبعا ماخدتش الشهر ده،  
جيت اشدتغل في شركة أخرى فترة وكنت مرتاحة جدا بس حصلت لي ظروف  
وقعدت في البيت، فهما بعتولي، قالوا لي مرتبك هيبقي ٧٠٠ زي ما بتاخدي في  
الشركة الجديدة، وهتمشي الساعة ٤، فعلا ده حصل، بس انا باخرج الساعة ٤ باقعد ٤  
ساعات في الشارع عشان الاتوبيس يطلع، قعدت فترة ارواح موصلات، اللي هاقبضه  
هاروح بيه موصلات، دي حاجه، احنا مرتبنا كده علشان بنقعد اكثر من مرحلة،  
فيه ناس اعمال مساعدة ستات كبيرة، وفيه بنات بس بياخدوا ٢٠٠ جنيه و ١٠٠ بدل

انتظام، طبعا لو غابوا يوم او نص يوم ال ١٠٠ جنيه دي نتشال، فيه ٣٠٠ جنيه عشان من ٨ الي ٨ شغل، فهي دي المشاكل، وشكرا.

\* (م.ش) عاملة إحدى شركات الملابس الجاهزة: علي فكرة ليا معدل المفروض ان أنا أطلعته في اليوم لغاية الساعة ٤، المهم أنا طلعت معدل الساعة ٤ اللي هو حاططهولي، قالي انت عندك الف حنة تطلعهم وتمشي الساعة ٤، خلصت الالف حنة واتوبيسنا يمشي الساعة ٦ اشتغلت الساعتين دول من عندي، لأ انت ما تروحيش في اتوبيسك، انت تقعدني وتروحي موصلات عشان فيه شغل علي المرحلة بتاعتك، طاب انا مالي مش فيه ناس معايا علي المرحلة، ويعدين أنا من السويس، المهم الكلام ده كان يوم ٢٩ وعملني انتهاء بدون مستحقات، ليا ٧٠٠ جنيه وعملني انتهاء يوم ٢٩ يعني باقي يوم علي الشهر، فعملني انتهاء بدن مستحقات وماخدش فلوسي، رحت اسأل علي تأميني اللي كل شهر بيتخصملي مالفيتش متامن عليا، خالص من سنة ونص مش متامن عليا وانا كل شهر بيتخصم مني "١٥ جنيه" تأمين، اشتغلت في شركة تاني، يوميا الاتوبيس لازم يعطل في الطريق، يعني احنا من السويس والمفروض يجيب للحنت البعيدة دي اتوبيسات توصل بينا، مش يعطل، ونكمل موصلات، يا أما نقعد في الطريق لغاية لما يجيبولنا وسيلة موصلات، الاتوبيس هو المشكلة الوحيدة، احنا بنطلع الساعة ٥ ونص من السويس بنوصل الساعة ٨، ييقف في الطريق بنقول للسواق انت واقف ليه بيقول لنا علشان أبرد الاتوبيس، يعني الاتوبيس بيسخن في الطريق مرتين او ثلاثة، ويقف مرتين او ثلاثة بيرد الاتوبيس.

\* هالة شكر الله: انتم بتكلموا ازاى عن مشاكلكم هل بتروحوا مجموعة، هل بيروح فرد فرد، ايه طريقة المطالبة بتاعتكوا؟

\* \* يعني أنا أروح مثلا لوحدي، محدش بييجي معايا، بس أنا لو اتكلمت لوحدي هيكمنولني، يعني طاب خلاص امشي بقي طالما مشكلتك الاتوبيس وانت عندك مشكلة في الشركة ما تجيش تاني، انا لو رحت لوحدي هاتكمنل بيقي خلاص.

\* محاولتيش تروحوا كمجموعة؟

\* \* روحنا كمجموعة، هما لما بيغيروا لنا الاتوبيس يجيبولنا اتوبيس نفس الطريقة،

الاتوبيس بس هو اللي بيتغير بس هي هي المشاكل ما بتتغيرش.

\* محمد النفاوي، المنتدي المدني الديمقراطي بالسويس: أنا بس عايز أوضح ان العاملين بمنطقة الاستثمار بالإسماعيلية هيتعرضوا في المرحلة اللي جاية لنوع من استخدامهم ضد بعض، فيه ناس من الإسماعيلية، فيه ناس من ريف الإسماعيلية، فيه ناس من السويس، فيه ناس من الشرقية، أحيانا يوفر هو الاتوبيس الجيد للمكان الأقرب، بيتم استخدام الناس ضد بعضها، بمعنى الناس بتاعة الإسماعيلية، طاب ليه بتوع السويس جايين، والكلام ده احنا بنحاربه كمان في السويس، يعني بنحارب مسألة انك جاي تشتغل في السويس ليه، ده كلام فارغ لان الدستور أعطى الحق للمصري أن يعمل في اي مكان، ولو فيه فوائد هتعود علي اللي جاي من الخارج هتعود أكثر علي اللي موجود في المكان، انا عايز انبه انه منبقاش حاطين في دماغنا ان انا من الإسماعيلية وده من السويس وجاي عندي ليه والعكس بالعكس، لانه اللي حاصل انه لما يلاقي فيه مشاكل جايه من بتوع السويس، يروح مستغني عنهم بيتدي بيعت لهم الاتوبيسات السيئة، وبعدين يستخدم بتوع الإسماعيلية وبعد ما ينفرد بيهم بيتدي يعاملهم المعاملة السيئة، طبعا احنا سامعين رقم ال ٧٠٠ جنيه متردد كثير في دبي وسفكس، انا عايز انبه ان في واقع الحال، الكلام ده طبعا للي بيعمل في مصر ايران او في تراست اللي هي قطاع خاص مبلغ كبير، في الحقيقة ده ما بيحصلش انه في ولا شهر من السهل جدا انه يخصم له ما يسمي ببذل الانتظام، عايزين نحط فكرة بدل الانتظام، بدل الانتظام دي هي عقاب لمن يطالب باجازه، او يضطر انه يغيب، فانا لما يحط لي بدل انتظام ١٠٠ جنيه فيجي شايلهم لي بمنتهي البساطة، ممكن يعمل ده عشان ساعة، انا بس عايز نحدد المشاكل الرئيسية لأن فيه منطقة الاستثمار في الإسماعيلية جمهورية لوحدها. مقيش لجنة نقابية طبعا، ما يسمي بالمتطلبات الجماعية بتقتصر علي ان ٣ او ٤ بنات لما يضيق بيهم الحال يروحوا يكلموا مدير انتاج يكلموا مشرف، انما هناك المسألة النقابية منعدمة، الوعي النقابي منعدم، وبالتالي كل الجمعيات لازم تساعد في النقطة دي، بدل الإنتظام، المواصلات، محاولة نشر الوعي النقابي بين هؤلاء العاملات بيخافوا يتكلموا، يعني مش واصلين حتي نوصف ان فيه عمليات بتحرش لفظي، فيه بنات وسيدات لما بتشوف تحرش لفظي بتسيب العمل، ومبتعرفش حتي تشرح لك أو تشرح لغيرك إيه الموضوع، فاحنا عايزين نحط عينا علي هذه المنطقة اللي بقت فيها شركات متعددة الجنسيات هندية وكورية، وشكرا.



\* هالة شكر الله: طيب انا متهيلالي ان احنا وصلنا للنقطة اللي عايزين نتقدم بها لقدام، يعني واضح طبعا بتتوع المناطق والمصانع احنا قدام شروط عمل قاسية جدا فعلا تشبه الصخرة، وحد قال الكلمة دي قريبة جدا من الصخرة اللي هي اوقات العمل المفتوحة والأجر المتدني جدا في ظروف الأسعار بترتفع بشكل جنوني، وبلا رقابة علي أصحاب العمل وأصحاب رؤوس الأموال وبلا حماية للعمال او للعاملات بشكل خاص، وزى ما قال ا/ النفيلاوى أنا اعتقد فيه مضايقات اكثر بكثير بتقع علي العاملات لا تذكر من الحرج، يعني فيه مش بس التحرش اللفظي أحيانا تحرشات أخرى، ودي بتبقي ضغط نفسي شديد جدا علي العاملات، ويتمنعهم من حق العمل وزى ما قلتي مفيش عاملة النهاردة بتعمل ترفاء، ده هي بتعمل أسرة، ومفيش أسرة النهاردة ممكن تعيش بدون عمل الأطراف كلها، يعني تقريبا ثلثين او اكثر من الأسر المصرية بتبقي اكثر من حد بيعمل عشان تقدر تعيش، يعني البقاء بس مش حتي الرفاهية، فشروط العمل أصبحت قاسية جدا، ما ينفعش انه احنا كمواطنين في البلد دي نفضل مكتوفي الأيديين قدام اي فئة من فئات الشعب اللي بتعاني المعاناة دي، طاب ايه العمل، أنا متهيلالي ده السؤال اللي احنا علينا نسأله لنفسنا، طاب ايه العمل؟ كل واحدة خايفة انها تنقذ عملها، لأنها لو راحت اشتكت هينقال لها بره، طاب ايه دور الجمعيات اللي موجودة اللي ممكن انها تدافع عن حقوق العاملات وحقوق العمال، ايه دورنا احنا كمنظمات المفروض انها بتدافع عن حقوق النساء في مصر، ازاي نقدر نشغل مع بعض، يعني كل الحاجات دي متهيلالي كلها حاجات مطروحة علينا ومطروحة عليكموا، أنا في رأيي ان من اول الحاجات اللي اتطرحت أد إيه احنا واعيين بحقوقنا، طاب إيه دور الجمعيات إن هي تتقل الوعي ده وتدافع عنه، إيه الحقوق الاقتصادية والاجتماعية اللي المفروض مكفولة لكم دستوريا وبالاتفاقيات الدولية، المفروض ان كلنا نتسلح بالمعرفة دي، عشان نقدر ندافع عن حقنا، ده طبعا ما بيمنعش ان الواحد لما بيتكلم عن حق ممكن يتعرض لإضطهاد، طاب ازاي بيبقي فيه اشكال من التضامن اللي تحمي الناس من الاضطهاد، ازاي بيبقي فيه روابط بين العاملات وبعض، إزاي بيبقي فيه روابط بين الجمعيات وبعض، فمحدث يقدر لواحد، محدش يتعرض للاضطهاد لواحد والباقي يسكت، دي كلها حاجات متعارف عليها في بلاد العالم متهيلالي الوقت جه ان احنا كمان نبتدي نحاول انها تبقى متواجدة عندنا عشان حق الناس ما يبقاش مهضوم بالشكل ده، مبيقاش كمية الوحوش اللي داخله برأسمالها وكذا وطايحة في الناس لأنهم ما اتعلموش يدافعوا عن أنفسهم، لأن مش عارفين حقهم اللي يدافعوا عنه، فخلينا نشوف نبتدي خطوات، ونبقي كل الجمعيات اللي موجودة

لو عندها استعداد انها تشتغل مع بعض في المساحة دي وانها تبدأ تتقل الوعي الحقوقي والقانوني للعمال والعمالات وتبتدي العاملات نفسهم يبقو عندهم استعداد انهم يجمعوا بعض ويبتدي يبقو فيه شكل من اشكال الروابط اللي، انا متهيلالي ان ده ممكن يحرز تقدم مش بسيط وتبقى خطوة علي الأقل.

\* منيرة صبرى: ببقى مع بعض وده بيدينا قوة، وزى ما احنا عارفين الحدوته الشهيرة بتاعت العود اللي لواحد بيتكسر ولما بنبقي حزمة مع بعض محدش يقدر يقطعنا، بالعكس ممكن نبقى ايد قوية، انا شايعة برده، انا هاتكلم لأنى انا ست بتاعة التدريب ومسئولة التدريب وكل شوية عيني علي التدريب وعيني علي الموضوعات الي انتوا طلعتوا بيها، انتوا طرحتموا النهاردة افكار كثيرة جدا تتعلق بمعرفة الحقوق، يعني بداية خطوة ان احنا نشغل ان احنا نعرف حقوقنا، انتوا طرحتموا حاجات كثيرة جدا، طرحتموا الحقوق الاقتصادية للمواطن والمرأة بشكل اساسي، حقوق العمل، انا شايعة ان احنا محتاجين جدا نعرف تفاصيل التفاصيل عن المسائل دي، لأن دي بتعتبر خطوة لقدام، طرحتموا الحقوق الصحية، الطب الصناعي، طرحتموا بشدة ايه هي حقوقنا الصحية الصناعية، طرحتموا الحقوق القانونية العمالية وقانون العمل، وفيه كمان حاجة احنا مش بس بنستند لقانون العمل علشان يحمينا، ده مصر موقعة علي اتفاقيات دولية محتاجين نعرف كيف يمكن نقدر نستخدمها، يعني المهم قوي نعرف الحقوق القانونية الموجودة في قوانيننا وكمكان الاتفاقيات لأنها بتعتبر زي القانون بالظبط كمان كنا نسأل علي لجنة نقابية، واضح ان احنا محتاجين برضه نعرف عن اللجان النقابية وازاي نشكلها، الحق في ان احنا نبقى منظمين، علشان ده بيقوينا يا جماعة، وكمكان كان فيه حد اتكلم عن التحرش، ان ممكن يبقو الحقوق الإنسانية وبالذات التحرش احنا بنعتبره من العنف الموجه ضد المرأة، انا شايعة ان الحاجات دي كلها يا جماعة لو وفرنا المكان، ممكن اجي لغاية عندكم ونعمل التدريب يوم اجازتكو، أنا ممكن اجي الجمعة ونيجي الجمعة الي بعدها، مش لازم نخليكو تغييوا ما دام الغياب بالخصم والحاجات دي، يعني جينا الجمعة دي نكمل تدريب الجمعة الي بعدها معنناش مشكلة خالص، نوفر بس مكان، انا اخدت كل العناوين، ونحاول نبقى فعلا مع بعض، المعرفة بداية خطوة لقدام، بنعرف علشان نقدر ناخذ بناء علي الوعي بتاعنا، ونقدر نتعلم ازاى بنقدر نتفاوض مع بعض، وينقل قدراتنا في التفاوض مع بعض، وأنا اعتقد اننا لما نتقابل مرة في التدريب مع بعض هنقدر نعمل بعض وربنا معاكوا بصراحة.

\* محمد إسماعيل، جمعية بلدي بورسعيد، زي ما أشار البعض أن مشاكل العاملات، طبعا هي لها خصوصية داخل قطاع العمل، لكن هي برضه بتتشابه في كثير جدا خصوصا لما بتتكلم عن القطاع الخاص مع مشاكل جميع الفئات العاملة داخل القطاع ده، بس فيه جزئية، أنا مش هاتكلم عن المشاكل نفسها لكن تحديدا دور الجمعيات الأهلية أو دور المجتمع المدني في مساعدة الفئة دي أن هي تأخذ حقوقها ان هي توصل لهدف تحسين أوضاعها، إذا كان مش متاح طبقا لقوانين المصانع دي وإنشائها وقوانين الاستثمار أو ما يتم الإدعاء به أن ما ينفعش يبقى لهم لجان نقابية، إذا كان ده مش متاح داخل مواقع العمل، فمن الممكن توفير امكان لهم تبقي فيها روابط للعاملات في المصنع كذا في المصنع كذا في القطاع الفلاني داخل الجمعيات الأهلية ويتم من خلال هذه الروابط القانونية. احنا بتتكلم لو ده مش متاح في المرحلة الحالية دلوقتي، مش هتقدر داخل العمل عشان وقت العمل عشان المشرفين أو كلام من هذا القبيل، انه زي ما قالت الأستاذة انه في ايام عطلات زي الجمعة مثلا نتدرب فيها وفيه مكان للقاء، نتدريهم علي مهارات التفاوض، ان هما ازاى يعملوا داخل العمل الضغط ده، دي جزئية مثلا ممكن الجمعيات الأهلية توفرها مثلا، مش هيقعدوا في الشارع ومش هيقعدوا في امكان العمل، لكن احنا كاماكن نستضيفهم وندي لهم الخبرة في ده، جزئية خاصة بمراكز المساعدة القانونية ان الشكاوي اللي محدش عايز يستناها، مش عارف يحلها، مش عارف هو هيروح لمين، مكاتب العمل ما بتساعدوش، من الممكن من داخل الجمعيات الأهلية ان نقدم مكاتب المساعدة دي مراكز المساعدة القانونية، ان احنا نتولي تصنيف الشكاوي، هتروح لمين، هنعمل إيه، يبقى فيه محامون ممكن يمارسوا ده بالنيابة عنكوا، يعني فيه توكيلات داخل المراكز القانونية لو بتسمعوا عنها، ممكن الناس اللي بتمشي بفصل او انتهاء تعاقد بدون أجر مثلا، الأشكال التعسفية دي ممكن أنه بدل ما يرفع قضية ومبيعرفش يوصل في الآخر، الاستقلالات دي والتوقيع علي الإستمارة (٦)، من داخل مراكز المساعدة القانونية دي يتم رفع وعي العاملات بحقوقهن في التعاقد او انتهاء التعاقد او في الحصول علي ساعات اضافي والكلام من ده، يتم مساعدتهن فيها. طبعا فكرة المراكز القانونية دي منتشرة في قضايا ثانية وفي فروع ثانية في العمل المدني، لكنه القطاع بتاع العاملات ومشاكل العاملات بصراحة يعني أنا أشكر مؤسسة "المرأة الجديدة" أن هي ادت لكم قوة ودخلة في أرض جديدة يعني نتمني لهم التوفيق ونساعدهم فيها، ففكرة نشر المراكز القانونية اللي بتقوم بها الجمعيات الأهلية ويتوفرها في القطاع ده أمر مهم جدا.

\* هناء أبو الحجاج عضو مجلس محلي، السويس: أولا أنا سعيدة جدا باللقاء مع حضراتكم، وعارفة فعاليته وجديته جدا والدليل علي كده أن أنا جيت من غير دعوة، زي ما الدكتور هالة قالت أن البنات اللي تم الالتحاق بالعمل في المصانع، قبل ما بيروحو المصانع دي يعملوا لهم فترة تدريب، ويعرفوهم واجباتهم وحقوقهم إيه، حقوقهم القانونية والسياسية وحقوق العمل في المصنع، باعلن إن أنا مسئولة لو البنات فيه عملت مذكرة وجولي أنا هاوديهم للمحافظ وهيعد معاهم ومن خلال اتصالاته مع مسئول المصنع ده هيتم بالفعل حل المشكلة دي

\* هالة شكر الله: أنا طبعا رأيي المجلس المحلي له دور، أنا متهيالي مهم انه يبقى موجود مع الناس، يعني المجلس المحلي المفروض انه بيمثل مصالح الناس، فاحنا بنرحب بالكل وأنا اللي عايزة اقله بس ان احنا مع بعض، وأنا طبعا سعيدة جدا بكلمة حضرتك ان الجمعيات بتبقي بتلعب دور في التوعية، مش بس التوعية.

\*\* ما المجلس المحلي حتي لما بيجي ما بيعملناش حاجة.

\* هالة شكر الله: هناء موجودة هتقدر تعمل حاجة.

\*\* ما الدورات اللي قبل كده مفيش حد عمل حاجة.

\* هالة شكر الله: مجلس مش عايزين نياس احنا بنقول احنا مع بعض، مش كده، وانتوا مع بعض، الجمعيات هنا، فيه عدد من الجمعيات بتقول احنا هنشتغل في هذا الموضوع وهنبي معاكوا، وهبيقي فيه دورات للتوعية بالحقوق وبالاتفاقيات، ازاي هنقدر نأخذ حقوقنا، طاب نطالب مين، طاب ايه افضل طريقة، طاب نتفاوض ازاي، طاب ازاي نقوي بعض، كل الحاجات دي الجمعيات اللي موجودة، وخلصني ما افترض حاجه ان انتوا ما بتقولوهاش، بس هنا فيه جمعية اتكلمت وامل هنتكلم احنا ممكن نعمل ايه وهنتكلم عن ان موضوع الشكاوي ممكن يحصل فيها ايه علي أساس أن ممكن فعلا يبقى فيه مساهمة مننا.

\* د/ أمل عبد الحميد: هو طبعا أنا شايفة أن فيه حاجة ايجابية جدا تمت النهاردة ان احنا نتعرف علي بعض، ابتدئنا نتعرف علي ان فيه حاجه اسمها مجلس محلي مستعد

ان هو، او شخص في مجلس محلي مستعد ان هو يساعدنا، ابنتينا نعرف ان فيه جمعيات كل جمعية مستعدة ان هي تقدم دعما معينا بجزئية خاصة قانونية او تدريب او غيره، في السياق ده انا بحب نبتدي بالخطوة العملية، يعني دايما لما نتكلم وعازين نخلي فيه تواصل بينا وبين بعض، لازم التواصل ده يبتدي بحاجة عملية نقرها دلوقتي مع بعض ونتفق عليها، بحيث ان احنا نقول هنبتديها مع بعض وأول المشوار اللي هنمشي فيه سواء، وزى ما دكتورة هالة قالت وكثير منّا قال ان الموضوع مش هانفع انه لا جمعية لوحدها ولا فرد لوحده جوه مصنع يقدم شكوي فيلخد حقه، لازم علشان نعمل حاجة زي كده ونلخد حقنا، لازم نبقى مجموعة ضاغطة يعني مجموعة مع بعضنا نقدم شكوي جماعية، والشكوي الجماعية دي تبقى وراها ناس بتعلم عنها في الإعلام، ناس بتقدمها في المحكمة، ناس بتتكلّم عليها في المجتمع المدني في الجمعيات الأهلية بحيث ان يبقى فيه اكثر من صوت مسموع، يعني لازم في الآخر بنوصل للنتيجة، ممكن تبقى نتيجة صغيرة، بعد شوية بنوصل للنتيجة اللي بعدها، أنا شافية ان المشاكل كثيرة وكل المشاكل مهمة جدا بالنسبة لانا، بس ضروري نعرف من اين نبتدي ايه اكثر حاجة ملحة علينا نقدر نتجمع عليها في الوقت الحاضر نبتدي بيها ويعدين تليها المشكلة اللي بعدها، فانا بقتراح ان احنا كجمعية بتقدم دعم قانوني وتدريب انا طبعا شايפה ان احنا محتاجين لحاجات محددة في التدريب ونقل الوعي القانوني او النقابي، كمان محتاجين بشكل عملي ان الوعي بتاعنا ده ان نلمسه بأيدنا، ان لو عندنا شكوي محددة دلوقتي نتفق مع بعض مجموعة في شركة ان احنا ايه الخطوات القانونية اللي ممكن نتبع في الشكوي دي ونقدمها ونلخد فيها خطوات قانونية، ومن خلال حتي الشكوي دي والخطوات اللي احنا بنعملها ده تدريب كمان عملي لينا باننا ازاى نحصل علي حقوقنا، ازاى لما نتعرض لحاجة لمشكلة جوه الشغل ازاى نلجا الأول لمكتب العمل ويعدين نلجا للجنة الخماسية ويعدين نلجا للمحكمة، خطوات احنا مش عارفينها نبتدي نعرفها، نعمل رابطة بينا وبين بعضنا وزى ما قال الأستاذ احنا مش قادرين نعمل نقابة دلوقتي مش قادرين نبقى أعضاء نقابة، نعمل ربطة لينا، فانا حابة دلوقتي ان احنا نطلع من القعدة دي النهاردة بان انا هاقعد معاكم بعد منخلص، نشوف ايه هي اهم مشكلة عندنا بتؤرقنا نعمل بيها مذكرة ونبتدي نشوف قانونيا نبتدي نتصرف فيها ازاى، شكرا

\* \* حضرتك لو أنا عندي مشكلة تخصني لوحدي، طاب مفيش حد هيمشي معايا فيها ما هو حضرتك بتقولوا اعملوا رابطة، طاب افرض المشكلة دي تخصني أنا . وحت

كُتِبَت شكوي او كُتِبَت مذكرة.. وحصل لي ظرف طارئ أو عملت عملية جراحية او حصلت لي أي حاجة، ابص الاقي حوافزي راحت وحصلت لي مشكلة، المكان اللي أنا شغالة فيه ممكن يروح مني لأي سبب، طاب ازاي هاعمل رابطة.

\* هالة شكر الله: أنا متهالي ان دا ممكن يتحل واحنا معاكوا، يعني ده مع الجمعيات، انت لو لجأت للجمعية، الجمعية ممكن تعرفك علي كمية من الناس عندهم نفس المشكلة اللي انت بتتكلمي عنها دي وانت ماتعرفيهاش، فممكن احنا نجتمع بعضنا، يبقى فيه نقطة التقاء ونقطة الالتقاء دي هي اللي بتجمع الناس حواليتها وبعدين بعد كده بتتعرفوا علي بعض، وبتبتدوا حاجة واحنا بنبقي بنساعدكوا فيها، خرينا نشوف الحاجات دي لما ننقل للجمعيات، أنا بس هادي الكلمة لانتصار وبعدين هنشوف هنعمل إيه مع بعض يا جماعة.

\* انتصار بدر مؤسسة "المرأة الجديدة": أنا عايزة أقول بس ان موضوع مشاكل العاملات في المصانع مهواش مشكلة المنطقة الصناعية في الإسماعيلية او في السويس بس، الموضوع ده بقي علي مستوي كل المناطق الصناعية والمدن الصناعية اللي موجودة من الإسكندرية لأسوان، ولأن المشكلات اللي بتتعرض لها العاملات في معظم أنحاء الجمهورية أصبحت لاقتة للانتباه وبشدة، فبقي الجمعيات الأهلية دلوقتي الموجودة في هذه الأماكن بدأت تنتبه الي المسألة وبدأت تلعب دور، معظم الجمعيات اللي هنا سواء جمعية الشلوفة او جمعيتكم في الإسماعيلية كلها جمعيات في مناطق بتسكن فيها العاملات وطول الوقت انتوا بتتعاملوا معاها في أنشطة متعددة، من ضمن الحاجات دي المشكلات اللي بتتعرض لها العاملات، يوم ما بتتعرض لمشكلة داخل مصنعها بتلجأ للجمعية، ومن ضمن الأمثلة ان هنا في الشلوفة الجمعية هنا تدخلت في لحظة عشان توفر اتوبيس للعاملات في شركة ايران اللي بيمر علي البلد ياخذ عاملات البلد، اقصد ان الجمعيات الأهلية ممكن تلعب دور كبير جدا في مسألة متابعة مشكلات العاملات، تتبع مشكلاتها داخل المصانع ممكن تلعب دور رقابي لأنه للأسف الشديد القانون ما بيتنفذش في مصر، يعني القانون بيقول دور حضانة، المصانع ما بتعملش دور حضانة، القانون بيقول اتوبيسات ومواصلات المصانع ما بتعملش ده او بتجيبها في صورة سينة، القانون بيقول ما نشغلش عمالة موسمية عن طريق افراد، طول الوقت مقاولين الافراد هما اللي بيوردوا العاملات للمصانع اقصد ان الجمعيات الأهلية ممكن تلعب دور كبير جدا في المسائل دي وخصوصا ان كل المشكلات اللي

بتعرض لها التعاملات في اماكن تواجد هذه الجمعيات ويتعاملوا معهم بشكل او باخر بالإضافة طبعاً لدور التوعية، كل التعاملات التي بتشتغل ما يتمسكش عقود في ايديها بامارة إيه القانون بيقول أن من حق العاملة أنها تمسك عقد في ايديها، علي الأقل نبداً من القانون اللي ما بيطبّقش في مصر وتبقى دي بداية دور الحضانة دي مش مشكلة وفيه محاولات في بور سعيد، محاولة بناء دور حضانة كبيرة ومجموعة للمصانع داخل المنطقة الصناعية، وعدد كبير من الجمعيات الأهلية هناك في بورسعيد بادر بالمسألة دي، أهى دي مبادرة جيدة جداً. بس تكمل لأنها مكملتش، يعني أقصد أنه فيه حاجات كتير جداً ممكن تبدأ بها الجمعيات، وحاجات بسيطة من قلب القانون، لأن حتي هذا القانون لا يطبق.

\* سعودى عمر: انا هاتكلم عن مبادرة محلية، المنتدى المدني الديمقراطي ده شكل تنسيقي، احنا ما قبل الجمعية وما بعد التواجد الفردي، شكل تنسيقي من ناشطين من تيارات سياسية مختلفة ومن المهتمين بالعمل العام، احنا كان لدينا مبادرة، احنا معنيين بتعريف المواطن المصري بالحقوق الأساسية سواء السياسية والاقتصادية والاجتماعية، احنا معنيين بتأصيل الثقافة العلمية كنا مشغولين قوي، انما مشغولين قوي ان المواطن المصري والعامل المصري يعرف يعني ايه نقابة، يعرف يعني إيه مجلس محلي، يعرف يعني إيه مجلس شعب يعني إيه مجلس شوري وهكذا الي آخره، كان لنا مبادرة في سنة ٢٠٠٦ وكانت دي قبل انتخابات النقابات وكان لنا بالتعاون مع مركز هشام مبارك عملنا دورتين نقابيتين خاصتين بحقوق الحريات النقابية شاركنا فيهما الأستاذ خالد علي والأستاذ صابر بركات، في ٢٠٠٧ بالمشاركة مع جمعية النهوض بالمشاركة المجتمعية عمل المنتدى المدني الديمقراطي دورتين حول التعريف بالمعايير والحقوق ومعايير العمل الدولية، عايز اقول ان في الدوريتين كان يحضر جزء من العمال، لكن بيفضل سؤال مهم قوي، انا رأيي تقدر علي اكثر من مستوي، اذا كنا بنتكلم حول ان فكرة الدعم المعرفي الخاص بتعريف التعاملات بالحقوق وبمعايير العمل الدولية والحقوق لهذه التعاملات او لهؤلاء التعاملات بيتم وفقاً للاتفاقيات دولية اللي مصر موقعة عليها، مهم كمان ان يبقى فيه دعم قانوني لأن كتير من التعاملات بيتعرضوا لانتهاكات لهذه الحقوق، يمكن في اطار مبادرتنا احنا المجتمعية الخاصة بينا بنمارس ده بالتعاون مع مركز هشام مبارك، زميلات لنا لهم قضايا لان الشركة رافعة عليهم قضايا فصل، قدرنا من خلال مركز هشام مبارك نقدم لهم دعم قانوني، ده بالإضافة الي مجموعة اخري من القضايا، لكن هو انا عايز اقول

انه لدينا جمعيات تكاد تكون متخصصة في تقديم الدعم القانوني ودي مسألة نحتاجها كثير قوي العملات في مواقع العمل المختلفة، الجزء الخاص بالتدريب اللي اتكلمت عنه الأستاذة منيرة ده مهم جدا لكن أنا شايف كمان أنه محتاجين أن نمارس شكلا من اشكال الحملات لأن القضية ما بقتش قضية تشريع ولا قضية معرفة ده كمان تفعيل وقدره علي فرض احترام القانون علي اصحاب العمل، أنا مش عايز اقول في ده كلام كثير، باشكركم لكن بيفضل، انا طبعا اخذ بالي كويس قوي ان الجمعيات شغالة في موضوع التنمية من منظور حقوقي، لكن فيه زاوية ثانية ان العاملة هي بالفعل بقت في مازق اتعرضت للفصل مفيش بالفعل مورد للرزق وبالتالي هي بتحلم ان يبقى فيه دعم اقتصادي لحد ما الفترة اللي بتتعرض فيها للأزمة دي تجتازها، أنا أعتقد أن ده فيه كلام حول أن يبقى فيه نصوص في قانون التأمينات خاصة بالبطالة، المفروض بيبقي ان أنا باخد تعويض بطالة ٦ اشهر وشكرا.

\* هالة شكر الله: أنا بدأت أقلق شوية لأنني أنا مش عايزة يتأخروا قوي والناس تتعب، الساعة ٨ إلا ربع واحنا لسه بنتكلم علي المواصلات فانا يعني أولا عايزة اشكركم علي المجيء وعلي تلبية الدعوة، وأنا كلي امل فعلا ان احنا نبتدى خطوة أولي ونشتغل مع بعض، طبعا السؤال اللي انا كنت عايزة اسأله لكم حاجتين:

١- انه انتم تصوركوا للأجر الإنساني، الحد الأدنى للأجر الإنساني أد أيه، لأن احنا بنتكلم عن ١٥٠، ١٦٠ جنيها، ١٧٠، ٣٠٠ جنيها، ده والناس قاعدة تتاضل علي الحافز وعلي الربح وعلي الفتاتيت، فليه ما بيحصلش مناقشة خاصة علي الأجر اللي مفروض بيبقي موجود وبيبقى انساني وقادر علي ان الناس تعيش به لأنه بقي فيه حاجة اسمها المجلس الأعلى للأجور والمفروض انه يحدد الحد الأدنى للأجور، فدي المفروض انها تنتقل المناقشة دي للناس اصحاب المصانع ده حاجة ممكن بيبقي موضوع نناقشه بعدين.

٢- الحاجة الثانية احنا بنتكلم علي روابط وان احنا نبقى موجودين مع بعض بس ما شغناش رأيكم، هل فكرة انه تتعمل روابط في الجمعيات لكم كعاملات تتناقشوا مشاكلكم فيها وتبلوروا خطط فيها وتتفاعلوا مع بعض وتتبادلوا الخبرات، دي حاجة ممكن تشوفوها مفيدة ولا لا، يعني دي حاجة انتم شايفين انها مفيدة نخطوا فيها خطوات مع الجمعيات اللي موجودة هنا

\* رجب الشحات: احنا إن شاء الله في المرة الجاية هنلقي الضوء اكثر علي المواضيع



اللي احنا طرحناها دي ونشوف هنتعامل معاها ازاي، في النهاية بنشكر الحضور  
وبتمني إن شاء الله ان يكون لنا لقاءات أخرى. والسلام عليكم ورحمة الله وبركاته.





409

62

38w

Bibliotheca Alexandrina



0808102



مؤسسة المرأة الجديدة

١٤ شارع عبد المنعم رياض سند متفرع من شارع الرشيد

أحمد عرابي - المهندسين

تليفون: ٣٣٤٦٠٨٩٨

فاكس: ٣٣٤٦٤٩٠١